

Առանձին ֆինանսական հաշվետվություններ և Անկախ աուդիտորի եզրակացություն

«Ագրովիժն» ՓԲԸ

31 դեկտեմբերի 2025թ.

Բովանդակություն

Անկախ աուդիտորի եզրակացություն	3
Շահույթի կամ վնասի և այլ համապարփակ ֆինանսական արդյունքի մասին առանձին հաշվետվություն	6
Ֆինանսական վիճակի մասին առանձին հաշվետվություն	7
Սեփական կապիտալում փոփոխությունների մասին առանձին հաշվետվություն	9
Դրամական հոսքերի մասին առանձին հաշվետվություն	10
Առանձին ֆինանսական հաշվետվություններին կից ծանոթագրություններ	12

Անկախ աուդիտորի եզրակացություն

Grant Thornton CJSC
Yerevan Plaza Business Center
9 Grigor Lusavorich Street
Yerevan 0015
Republic of Armenia
T +374 10 50 09 64/61

Գրանթ Թորնթոն ՓԲԸ
Երևան Պլազա բիզնես
կենտրոն
ՀՀ, ք. Երևան 0015
Գրիգոր Լուսավորչի 9

Հեռ.՝ +374 10 50 09 64/61

«Ագրովիժն» ՓԲԸ-ի բաժնետիրոջը

Կարծիք

Մենք աուդիտի ենք ենթարկել «Ագրովիժն» ՓԲԸ-ի (Ընկերություն) առանձին ֆինանսական հաշվետվությունները, որոնք ներառում են 2025թ. դեկտեմբերի 31-ի դրությամբ ֆինանսական վիճակի մասին առանձին հաշվետվությունը, ինչպես նաև այդ ամսաթվին ավարտված տարվա շահույթի կամ վնասի և այլ համապարփակ ֆինանսական արդյունքի մասին առանձին հաշվետվությունը, սեփական կապիտալում փոփոխությունների մասին առանձին հաշվետվությունը և դրամական հոսքերի մասին առանձին հաշվետվությունը, ինչպես նաև առանձին ֆինանսական հաշվետվություններին կից ծանոթագրությունները, ներառյալ՝ հաշվապահական հաշվառման քաղաքականության վերաբերյալ էական տեղեկատվությունը:

Մեր կարծիքով, կից առանձին ֆինանսական հաշվետվությունները բոլոր էական առումներով ճշմարիտ են ներկայացնում Ընկերության առանձին ֆինանսական վիճակը 2025թ. դեկտեմբերի 31-ի դրությամբ, ինչպես նաև այդ ամսաթվին ավարտված տարվա առանձին ֆինանսական արդյունքները և առանձին դրամական հոսքերը՝ համաձայն հաշվապահական հաշվառման միջազգային ստանդարտների խորհրդի (ՀՀՄՍԽ) կողմից հրապարակված ՖՀՄՍ հաշվապահական հաշվառման ստանդարտների:

Կարծիքի հիմք

Մենք աուդիտն անցկացրել ենք աուդիտի միջազգային ստանդարտներին (ԱՄՍ-ներ) համապատասխան: Այդ ստանդարտներից բխող մեր պատասխանատվությունը լրացուցիչ նկարագրված է մեր եզրակացության՝ «Աուդիտորի պատասխանատվությունը առանձին ֆինանսական հաշվետվությունների աուդիտի համար» բաժնում: Մենք անկախ ենք Ընկերությունից՝ համաձայն Հաշվապահների էթիկայի միջազգային ստանդարտների խորհրդի կողմից հրապարակված «Պրոֆեսիոնալ հաշվապահի էթիկայի միջազգային կանոնագրքի» (ներառյալ՝ Անկախության միջազգային ստանդարտները) (ՀՀՄՍԽ կանոնագիրք) և էթիկայի համապատասխան պահանջների, որոնք կիրառելի են ֆինանսական հաշվետվությունների նկատմամբ Հայաստանի Հանրապետությունում: Մենք նաև կատարել ենք էթիկայի գծով մեր այլ պարտականությունները՝ նշված պահանջների և ՀՀՄՍԽ կանոնագրքի համաձայն: Մենք համոզված ենք, որ մեր կողմից ձեռք բերված աուդիտորական ապացույցները բավարար և համապատասխան հիմք են հանդիսանում մեր կարծիքն արտահայտելու համար:

Ղեկավարության և կառավարման օղակներում գտնվող անձանց պատասխանատվությունը առանձին ֆինանսական հաշվետվությունների համար

Ղեկավարությունը պատասխանատու է ՀՀՄՍԽ կողմից հրապարակված ՖՀՄՍ հաշվապահական հաշվառման ստանդարտների համաձայն առանձին ֆինանսական հաշվետվությունների պատրաստման և ճշմարիտ ներկայացման և այնպիսի ներքին հսկողության համար, որն ըստ ղեկավարության, անհրաժեշտ է խարդախության կամ սխալի հետևանքով էական խեղաթյուրումներից զերծ առանձին ֆինանսական հաշվետվությունների պատրաստումն ապահովելու համար:

Առանձին ֆինանսական հաշվետվությունները պատրաստելիս՝ ղեկավարությունը պատասխանատու է Ընկերության անընդհատ գործելու կարողությունը գնահատելու համար՝ անհրաժեշտության դեպքում բացահայտելով անընդհատության վերաբերող հարցերը, ինչպես նաև հաշվապահական հաշվառման անընդհատության հիմունքը կիրառելու համար, եթե ղեկավարությունը չունի Ընկերությունը լուծարելու կամ Ընկերության գործունեությունը դադարեցնելու մտադրություն, կամ չունի այդպես չվարվելու որևէ իրատեսական այլընտրանք:

Կառավարման օղակներում գտնվող անձիք պատասխանատու են Ընկերության ֆինանսական հաշվետվողականության գործընթացի վերահսկման համար:

Աուդիտորի պատասխանատվությունը առանձին ֆինանսական հաշվետվությունների աուդիտի համար

Մեր նպատակն է ձեռք բերել ողջամիտ հավաստիացում առ այն, որ առանձին ֆինանսական հաշվետվությունները բոլոր էական առումներով զերծ են էական խեղաթյուրումներից՝ անկախ դրանց՝ խարդախության կամ սխալի հետևանքով առաջացման հանգամանքից, և ներկայացնել մեր կարծիքը ներառող աուդիտորական եզրակացություն: Ողջամիտ հավաստիացումը բարձր մակարդակի հավաստիացում է, բայց այն չի երաշխավորում, որ ԱՄՄ-ներին համապատասխան իրականացված աուդիտը միշտ կհայտնաբերի էական խեղաթյուրումը, երբ այն առկա է: Խեղաթյուրումները կարող են առաջանալ խարդախության կամ սխալի արդյունքում և համարվում են էական, երբ խելամտորեն կարող է ակնկալվել, որ դրանք առանձին կամ միասին վերցրած կազմեցն օգտագործողների՝ այդ ֆինանսական հաշվետվությունների հիման վրա կայացվող տնտեսական որոշումների վրա:

Որպես ԱՄՄ-ներին համապատասխան աուդիտի մաս, աուդիտի ողջ ընթացքում մենք կիրառում ենք մասնագիտական դատողություն և պահպանում մասնագիտական կասկածամտություն: Ի լրումն՝

- Հատկորոշում և գնահատում ենք խարդախության կամ սխալի հետևանքով առանձին ֆինանսական հաշվետվությունների էական խեղաթյուրման ռիսկերը, նախագծում և իրականացնում ենք աուդիտորական ընթացակարգեր՝ այդ ռիսկերին արձագանքելու նպատակով, և ձեռք ենք բերում աուդիտորական ապացույցներ, որոնք բավարար ու համապատասխան հիմք են հանդիսանում մեր կարծիքի համար: Խարդախության պատճառով առաջացած էական խեղաթյուրման չհայտնաբերման ռիսկն ավելի բարձր է, քան սխալի հետևանքով էական խեղաթյուրման չհայտնաբերման ռիսկը, քանի որ խարդախությունը կարող է ներառել հանցավոր համաձայնություն, զեղծարարություն, միտումնավոր բացթողումներ, սխալ ներկայացումներ կամ ներքին հսկողության չարաշահում:
- Ձեռք ենք բերում պատկերացում աուդիտին վերաբերող ներքին հսկողության մասին՝ տվյալ հանգամանքներին համապատասխան աուդիտորական ընթացակարգեր նախագծելու, այլ ոչ թե Ընկերության ներքին հսկողության արդյունավետության վերաբերյալ կարծիք արտահայտելու համար:
- Գնահատում ենք հաշվապահական հաշվառման կիրառված քաղաքականության տեղին լինելը, ինչպես նաև ղեկավարության կողմից կատարած հաշվապահական հաշվառման գնահատումների և կից բացահայտումների խելամտությունը:
- Եզրահանգումներ ենք կատարում ղեկավարության կողմից հաշվապահական հաշվառման անընդհատության հիմունքի կիրառման տեղին լինելու վերաբերյալ և, հիմնվելով ձեռք բերված աուդիտորական ապացույցների վրա, գնահատում ենք՝ արդյոք առկա է էական անորոշություն դեպքերի կամ իրավիճակների վերաբերյալ, որը կարող է նշանակալի կասկած հարուցել Ընկերության անընդհատ գործելու կարողության վերաբերյալ: Եթե մենք եզրահանգում ենք, որ առկա է էական անորոշություն, ապա մեզանից պահանջվում է աուդիտորի եզրակացությունում ուշադրություն հրավիրել առանձին ֆինանսական հաշվետվությունների համապատասխան բացահայտումներին, կամ, եթե այդպիսի բացահայտումները բավարար չեն, ձևափոխել մեր կարծիքը: Մեր եզրահանգումները հիմնված են մինչև մեր եզրակացության ամսաթիվը ձեռք բերված աուդիտորական ապացույցների վրա: Այնուամենայնիվ, ապագա դեպքերը կամ իրավիճակները կարող են ստիպել Ընկերությանը դադարեցնել անընդհատության հիմունքի կիրառումը:
- Գնահատում ենք առանձին ֆինանսական հաշվետվությունների ընդհանուր ներկայացումը, կառուցվածքը և բովանդակությունը, ներառյալ բացահայտումները, ինչպես նաև առանձին ֆինանսական հաշվետվությունների հիմքում ընկած գործարքների ու դեպքերի ճշմարիտ ներկայացումը:

Շահույթի կամ վնասի և այլ համապարփակ ֆինանսական արդյունքի մասին առանձին հաշվետվություն

Հազար ՀՀ դրամ

	Ծանոթ.	2025թ.	2024թ.
Հասույթ		51,964	28,297
Վաճառքի ինքնարժեք		(11,500)	(5,450)
Համախառն շահույթ		40,464	22,847
Այլ եկամուտ		30	957
Շնորհից եկամուտ		2,289	2,289
Իրացման ծախսեր		(770)	(1,225)
Վարչական ծախսեր	5	(117,399)	(78,993)
Այլ ծախսեր		(17,985)	-
Գործառնական գործունեությունից վնաս		(93,371)	(54,125)
Շահաբաժիններից եկամուտ	8	383,912	310,000
Ֆինանսական եկամուտ	6	84,989	51,586
Ֆինանսական ծախսեր	6	(48,914)	-
Փոխարժեքային տարբերությունից զուտ վնաս		(1,520)	(1,487)
Շահույթ մինչև հարկերը		325,096	305,974
Շահութահարկի գծով փոխհատուցում	7	4,160	38,183
Տարվա շահույթ		329,256	344,157
Ընդամենը տարվա համապարփակ ֆինանսական արդյունք		329,256	344,157

Շահույթի կամ վնասի և այլ համապարփակ ֆինանսական արդյունքի մասին առանձին հաշվետվությունը պետք է ընթերցվի այս առանձին ֆինանսական հաշվետվությունների բաղկացուցիչ մասը կազմող 12-ից մինչև 38-րդ էջերում ներկայացված կից ծանոթագրությունների հետ մեկտեղ:

Ֆինանսական վիճակի մասին առանձին հաշվետվություն

Հազար ՀՀ դրամ		31 դեկտեմբերի 2025թ.	31 դեկտեմբերի 2024թ.
	Ծանոթ.		
Ակտիվներ			
Ոչ ընթացիկ ակտիվներ			
Հիմնական միջոցներ	9	48,296	49,122
Ներդրումային գույք	10	47,903	52,125
Ներդրումներ դուստր կազմակերպություններում	8	1,349,500	1,045,100
Առևտրային և այլ դեբիտորական պարտքեր	13	-	89,601
Տրամադրված փոխառություններ	11	403,304	122,656
Ընդամենը ոչ ընթացիկ ակտիվներ		1,849,003	1,358,604
Ընթացիկ ակտիվներ			
Առևտրային և այլ դեբիտորական պարտքեր	13	8,467	30,131
Տրամադրված փոխառություններ	11	14,515	23,439
Դրամական միջոցներ և դրանց համարժեքներ	14	25,361	211,435
Ընդամենը ընթացիկ ակտիվներ		48,343	265,005
Ընդամենը ակտիվներ		1,897,346	1,623,609

Ֆինանսական վիճակի մասին առանձին հաշվետվություն (շարունակություն)

Հազար ՀՀ դրամ		31 դեկտեմբերի 2025թ.	31 դեկտեմբերի 2024թ.
	Ծանոթ.		
Սեփական կապիտալ և պարտավորություններ			
Սեփական կապիտալ	15		
Բաժնետիրական կապիտալ		270,000	270,000
Այլ տարրեր		495,690	495,690
Կուտակված շահույթ (վնաս)		993,896	744,640
Ընդամենը սեփական կապիտալ		1,759,586	1,510,330
Պարտավորություններ			
Ոչ ընթացիկ պարտավորություններ			
Ակտիվներին վերաբերող շնորհներ		31,477	33,767
Հետաձգված հարկային պարտավորություններ	12	66,467	70,627
Ընդամենը ոչ ընթացիկ պարտավորություններ		97,944	104,394
Ընթացիկ պարտավորություններ			
Առևտրային և այլ կրեդիտորական պարտքեր	16	13,566	8,885
Ստացված փոխառություններ		26,250	-
Ընդամենը ընթացիկ պարտավորություններ		39,816	8,885
Ընդամենը սեփական կապիտալ և պարտավորություններ		1,897,346	1,623,609

Առանձին ֆինանսական հաշվետվությունները հաստատվել են 2026թ. ապրիլի 21-ին.

Նվարդ Անանյան

Տնօրեն



Հասմիկ Ռաթնույան

«Անալիտիկա» ՓԲԸ-ի տնօրեն



Ֆինանսական վիճակի մասին առանձին հաշվետվությունը պետք է ընթերցվի այս առանձին ֆինանսական հաշվետվությունների բաղկացուցիչ մասը կազմող 12-ից մինչև 38-րդ էջերում ներկայացված կից ծանոթագրությունների հետ մեկտեղ:

Սեփական կապիտալում փոփոխությունների մասին առանձին հաշվետվություն

Հազար ՀՀ դրամ

	Բաժնե- տիրական կապիտալ	Այլ տարրեր	Կուտակված շահույթ (վնաս)	Ընդամենը
2024թ. հունվարի 1-ի դրությամբ մնացորդ	270,000	495,690	440,483	1,206,173
Տարվա շահույթ	-	-	344,157	344,157
Ընդամենը տարվա համապարփակ ֆինանսական արդյունք	-	-	344,157	344,157
Շահաբաժիններ	-	-	(40,000)	(40,000)
Գործարքներ սեփականատերերի հետ	-	-	(40,000)	(40,000)
2024թ. դեկտեմբերի 31-ի դրությամբ մնացորդ	270,000	495,690	744,640	1,510,330
Տարվա շահույթ	-	-	329,256	329,256
Ընդամենը տարվա համապարփակ ֆինանսական արդյունք	-	-	329,256	329,256
Շահաբաժիններ	-	-	(80,000)	(80,000)
Գործարքներ սեփականատերերի հետ	-	-	(80,000)	(80,000)
2025թ. դեկտեմբերի 31-ի դրությամբ մնացորդ	270,000	495,690	993,896	1,759,586

Սեփական կապիտալում փոփոխությունների մասին առանձին հաշվետվությունը պետք է ընթերցվի այս առանձին ֆինանսական հաշվետվությունների բաղկացուցիչ մասը կազմող 12-ից մինչև 38-րդ էջերում ներկայացված կից ծանոթագրությունների հետ մեկտեղ:

Դրամական հոսքերի մասին առանձին հաշվետվություն

Հազար ՀՀ դրամ

	2025թ.	2024թ.
Գործառնական գործունեությունից դրամական հոսքեր		
Տարվա շահույթ	329,256	344,157
Ծախսեր		
Շնորհներից եկամուտ	(2,289)	(2,289)
Մաշվածության ծախս	5,614	5,191
Հիմնական միջոցների օտարումից վնաս	1,609	-
Շահաբաժիններից եկամուտ	(383,912)	(310,000)
Ֆինանսական ծախսեր	48,914	-
Ֆինանսական եկամուտ	(84,989)	(51,586)
Շահութահարկի գծով փոխհատուցում	(4,160)	(38,183)
Կասկածելի դեբիտորական պարտքերի պահուստի շարժ	(6,788)	(6,692)
Փոխարժեքային տարբերությունից վնաս	1,520	1,487
Գործառնական վնաս նախքան շրջանառու կապիտալի փոփոխությունները	(95,225)	(57,915)
Առևտրային և այլ դեբիտորական պարտքերի փոփոխություն	153,492	143,196
Պաշարների փոփոխություն	-	81
Առևտրային և այլ կրեդիտորական պարտքերի փոփոխություն	3,681	(10,968)
Գործառնական գործունեությունից ստացված դրամական միջոցներ	61,948	74,394

Դրամական հոսքերի մասին առանձին հաշվետվություն (շարունակություն)

Հազար ՀՀ դրամ

	2025թ.	2024թ.
Ներդրումային գործունեությունից դրամական հոսքեր		
Տրամադրված փոխառություններ	(374,558)	(64,487)
Տրամադրված փոխառությունների մարում	57,346	14,000
Ստացված տոկոսային եկամուտ	32,109	12,928
Ներդրում դուստր կազմակերպությունում, զուտ	(304,400)	(155,600)
Հիմնական միջոցների ձեռքբերում	(2,175)	(615)
Ստացված շահաբաժիններ	396,412	306,226
Ներդրումային գործունեությունից ստացված (գործունեության համար օգտագործված) զուտ դրամական միջոցներ	(195,266)	112,452
Ֆինանսավորման գործունեությունից դրամական հոսքեր		
Փոխառություններից մուտքեր	26,250	-
Վճարված շահաբաժիններ	(79,000)	(36,000)
Ֆինանսավորման գործունեության համար օգտագործված զուտ դրամական միջոցներ	(52,750)	(36,000)
Դրամական միջոցների և դրանց համարժեքների զուտ աճ (նվազում)	(186,068)	150,846
Արտարժույթի փոխարժեքի ազդեցությունը դրամական միջոցների վրա	(6)	2
Դրամական միջոցներ և դրանց համարժեքներ տարվա սկզբում	211,435	60,587
Դրամական միջոցներ և դրանց համարժեքներ տարվա վերջում	25,361	211,435

Դրամական հոսքերի մասին առանձին հաշվետվությունը պետք է ընթերցվի այս առանձին ֆինանսական հաշվետվությունների բաղկացուցիչ մասը կազմող 12-ից մինչև 38-րդ էջերում ներկայացված կից ծանոթագրությունների հետ մեկտեղ:

Առանձին ֆինանսական հաշվետվություններին կից ծանոթագրություններ

«Ագրովիժն» ՓԲԸ

2025թ. դեկտեմբերի 31-ին ավարտված տարվա համար (արտահայտված հազար
հայկական (<<) դրամով)

1 Գործառնությունների բնույթը

Ագրովիժը փակ բաժնետիրական ընկերություն է, որը զբաղվում է գյուղատնտեսական ապրանքների առևտրով, գյուղատնտեսության արտադրության բոլոր ոլորտներում տրամադրում է տեխնիկական աջակցություն և խորհրդատվական ծառայություններ:

2 Ընդհանուր տեղեկատվություն, ՖՀՄՍ հաշվապահական հաշվառման ստանդարտներին համապատասխանության հավաստում և անընդհատության ենթադրություն

«Ագրովիժ» ՓԲԸ-ն (Ընկերություն) հանդիսանում է ՔԱՐԴ խմբի անդամ, որի առաքելությունն է աջակցել ֆերմերներին և ագրոբիզնեսներին սննդամթերքի և հարակից ապրանքների արտադրության և շուկայավարման գործում՝ եկամուտներ ավելացնելու և աշխատատեղեր ստեղծելու միջոցով նպաստելով գյուղական բնակչության կենսաապահովմանը:

Ընկերությունը գրանցվել է Հայաստանի Հանրապետության իրավաբանական անձանց պետական ռեգիստրում 2006թ. փետրվարի 6-ին: Ընկերությունը գրանցված է Հայաստանի Հանրապետություն, ք. Երևան 0037, Ազատության պողոտա, 1/21-40 հասցեում:

Ընկերության գլխավոր մայր ընկերությունը՝ «Ագրոբիզնեսի և գյուղի զարգացման կենտրոն» հիմնադրամը (մայր ընկերություն), հիմնադրվել և գործում է Հայաստանի Հանրապետությունում: Այդ ընկերության գրանցման վայրն է՝ Հայաստանի Հանրապետություն, ք. Երևան 0037, Ազատության պողոտա, 1/21-40:

Սույն ֆինանսական հաշվետվությունները համախմբվում են «Ագրոբիզնեսի և գյուղի զարգացման կենտրոն» հիմնադրամի կողմից:

Ընկերության աշխատակիցների միջին թվաքանակը 2025թ. կազմել է 10 մարդ (2024թ.՝ 5 մարդ):

Դուստր ընկերություններ

Ընկերությունն ունի հետևյալ դուստր ընկերությունները.

Դուստր ընկերություն	Մասնաբաժին %				Գործունեության ոլորտ
	31 դեկտեմբերի 2025թ.	Գրանցման երկիր	Գրանցման ամսաթիվ	Բաժնետիրական կապիտալ	
«ԱգրոՏրենդ» ՓԲԸ	100%	Հայաստան	10.01.2019	240,000	Գյուղատնտեսական սարքավորումների վաճառք
«ՍմարթԱգրո» ՓԲԸ	80%	Հայաստան	10.01.2019	131,250	Անասնակերի ներմուծում և վաճառք
«Կուլտիվա» ՓԲԸ	100%	Հայաստան	01.06.2020	310,000	Գյուղատնտեսական սարքավորումների վաճառք
«ԱգրիԿոնցեպտ» ՓԲԸ	100%	Հայաստան	01.11.2019	90,000	Սննդի ներկրում և վաճառք
«ՔԱՐԴ Ագրոկրեդիտ» ՈՒՎԿ ՓԲԸ	79.62%	Հայաստան	27.06.2008	759,200	Գյուղատնտեսական վարկերի տրամադրում

Դուստր ընկերություն	Մասնաբաժին %		Գրանցման ամսաթիվ	Բաժնե- տիրական կապիտալ	Գործունեության ոլորտ
	31 դեկտեմբերի 2024թ.	Գրանցման երկիր			
«ԱգրոՏրենդ» ՓԲԸ	100%	Հայաստան	10.01.2019	80,000	Գյուղատնտեսական սար- քավորումների վաճառք
«ՍմարթԱգրո» ՓԲԸ	100%	Հայաստան	10.01.2019	105,000	Անասնակերի ներմուծում և վաճառք
«Կուլտիվա» ՓԲԸ	100%	Հայաստան	01.06.2020	170,000	Գյուղատնտեսական սար- քավորումների վաճառք
«ԱգրիԿոնցեսյո» ՓԲԸ	100%	Հայաստան	01.11.2019	70,000	Մենդի ներկրում և վաճառք
«ՔԱՐԴ Ագրոկրեդիտ» ՈՒՎԿ ՓԲԸ	100%	Հայաստան	27.06.2008	620,100	Գյուղատնտեսական վարկերի տրամադրում

Համապատասխանություն և անընդհատություն

Ընկերության առանձին ֆինանսական հաշվետվությունները պատրաստվել են համաձայն հաշվապահական հաշվառման միջազգային ստանդարտների խորհրդի (<<ՄՍՄ) կողմից հրապարակված ՖՀՄ հաշվապահական հաշվառման ստանդարտների:

Առանձին ֆինանսական հաշվետվությունները պատրաստվել են անընդհատության հիմունքներով, քանի որ ղեկավարությունը կարծում է, որ Ընկերությունն ունի համապատասխան ռեսուրսներ տեսանելի ապագայում անընդհատ գործունեություն իրականացնելու համար: Այս գնահատումը կատարելիս ղեկավարությունը հաշվի է առել տեղեկատվության լայն շրջանակ, ներառյալ շահութաբերության կանխատեսումը, կապիտալի նկատմամբ իրավական պահանջները և ֆինանսավորման կարիքները: Գնահատումը ներառում է նաև ողջամտորեն հնարավոր անկումային տնտեսական սցենարների և դրանց հնարավոր ազդեցությունների դիտարկումը Ընկերության շահութաբերության, կապիտալի և իրացվելիության վրա:

Գործարար միջավայր

2025թ. Հայաստանի գործարար միջավայրը շարունակում է գտնվել աշխարհաքաղաքական լարվածության, տարածաշրջանային անվտանգության ռիսկերի և գլոբալ տնտեսության փոփոխվող պայմանների ազդեցության տակ:

Ընթացիկ տարում տնտեսական ցուցանիշները տարբեր ոլորտներում անհավասար են եղել: Շարունակական աճը հիմնականում ապահովվել է առևտրի, ծառայությունների և շինարարության ոլորտներում՝ արտացոլելով մասնավոր սպառման և ներդրումային ակտիվության կայունությունը: Թեպետ նախկինում որոշակի ենթաճյուղերի կրճատումից կրած ազդեցության՝ արդյունաբերական արտադրությունը վերջին հաշվետու ժամանակաշրջանում ցուցաբերել է կայունություն և չափավոր բարելավում՝ նպաստելով արտադրական որոշակի գործունեության վերականգնմանը:

Ֆինանսական ոլորտը կայուն է մնացել՝ բանկային համակարգի բավարար կապիտալացվածությամբ և բանկային համակարգի պատշաճ վերահսկողությամբ պայմանավորված: Չնայած արտաքին ռիսկերի առկայությանը՝ կարգավորող վերահսկողությունը և վերահսկողական պրակտիկան շարունակաբար ապահովել են ֆինանսական հաստատությունների իրացվելիությունը, վճարունակությունը և գործառնական կայունությունը: 2025թ. Հայաստանի տնտեսական աճը կազմել է 5.1%, իսկ 2026թ. կանխատեսվում է 5.4%:

Ղեկավարությունը գնահատել է տնտեսական ընթացիկ միջավայրի ազդեցությունը Ընկերության գործունեության վրա և արտացոլել է դա սույն ֆինանսական հաշվետվություններում: Սակայն տնտեսական և քաղաքական հետագա իրավիճակը կարող է տարբերվել ներկայիս ակնկալիքներից, և նման տարբերությունները կարող են ազդել Ընկերության ֆինանսական վիճակի, արդյունքի և դրամական հոսքերի վրա:

3 Նոր կամ վերանայված ստանդարտներ կամ մեկնաբանություններ

3.1 2025թ. հունվարի 1-ի դրությամբ ընդունված նոր ստանդարտներ

Ընթացիկ տարում Ընկերությունն ընդունել է իր գործունեության համար կիրառելի և 2025թ. հունվարի 1-ից սկսվող ժամանակաշրջանների համար ուժի մեջ մտած բոլոր նոր և վերանայված ստանդարտները և մեկնաբանությունները, որոնք հրապարակվել են Հաշվապահական հաշվառման միջազգային ստանդարտների խորհրդի և ՖՀՄՍ մեկնաբանությունների կոմիտեի կողմից:

ՀՀՄՍ 21 «Արտարժույթի փոխարժեքի փոփոխությունների հետևանքներ» ստանդարտի փոփոխությունը՝ կապված «Փոխանակելիության բացակայության» հետ առաջին անգամ կիրառվել է 2025թ., որը սահմանում է պահանջներ՝ գնահատելու, թե երբ է արժույթը փոխարկելի այլ արժույթի նկատմամբ, և երբ՝ ոչ: Ստանդարտի այս փոփոխության ընդունումը ազդեցություն չի ունեցել Ընկերության առանձին ֆինանսական հաշվետվությունների վրա:

3.2 Ստանդարտներ, փոփոխություններ և մեկնաբանություններ գործող ստանդարտների վերաբերյալ, որոնք դեռևս չեն գործում և նախօրոք չեն ներդրվել Ընկերության կողմից

Այս առանձին ֆինանսական հաշվետվությունների հաստատման ամսաթվի դրությամբ Հաշվապահական հաշվառման միջազգային ստանդարտների խորհրդի (ՀՀՄՍԽ) կողմից թողարկվել են որոշակի նոր ստանդարտներ, փոփոխություններ և մեկնաբանություններ գործող ստանդարտների վերաբերյալ, որոնք սակայն դեռևս չեն գործում և նախօրոք չեն ներդրվել Ընկերության կողմից:

Ղեկավարությունը կանխատեսում է, որ բոլոր կիրառելի հրապարակումները կներդրվեն Ընկերության հաշվապահական հաշվառման քաղաքականությունում՝ սկսած հրապարակման ուժի մեջ մտնելու ամսաթվին հաջորդող առաջին իսկ ժամանակաշրջանից:

- ՖՀՄՍ 18 «Ֆինանսական հաշվետվությունների ներկայացում և բացահայտում»

2024թ. ապրիլին ՀՀՄՍԽ-ն հրապարակել է ՖՀՄՍ 18 «Ֆինանսական հաշվետվությունների ներկայացում և բացահայտում» ստանդարտը, որը փոխարինում է ՀՀՄՍ 1 «Ֆինանսական հաշվետվությունների ներկայացում» ստանդարտը: Չնայած ՖՀՄՍ 18-ը ներառում է ՀՀՄՍ 1-ի բազմաթիվ պահանջներ, այն ներկայացնում է նոր պահանջներ՝ ֆինանսական հաշվետվությունների կառուցվածքը բարելավելու և ներդրողներին ավելի մանրամասն ու օգտակար տեղեկատվություն տրամադրելու նպատակով, ներառյալ՝

- շահույթի կամ վնասի և այլ համապարփակ ֆինանսական արդյունքի մասին հաշվետվությունում երկու նոր ենթագումարի սահմանում՝ գործառնական շահույթ և շահույթ կամ վնաս մինչև ֆինանսավորումը և հարկերը
- շահույթի կամ վնասի և այլ համապարփակ ֆինանսական արդյունքի մասին հաշվետվությունում բոլոր եկամուտների և ծախսերի դասակարգում հետևյալ հինգ կատեգորիաներից մեկում՝ գործառնական, ներդրումային, ֆինանսավորման, հարկեր և ընդհատված գործառնություններ
- ղեկավարության կողմից սահմանված կատարողականի չափանիշների բացահայտման նոր պահանջ
- ֆինանսական հաշվետվություններում և կից ծանոթագրություններում ներկայացվող տեղեկատվության միավորման և տարանջատման սկզբունքների բարելավում

Նախկինում ՀՀՄՍ 1-ում ներառված որոշ բացահայտման պահանջներ տեղափոխվել են ՀՀՄՍ 8՝ առանց էական փոփոխությունների: Սա հատկապես վերաբերում է հաշվապահական հաշվառման քաղաքականության և գնահատման անորոշության աղբյուրների բացահայտումներին: Այս փոփոխությունների արդյունքում ՀՀՄՍ 8-ը կվերանվանվի «Ֆինանսական հաշվետվությունների պարզաստման հիմունքներ»:

Ի հավելում, ՀՀՄՍ 7 «Հաշվետվություն դրամական միջոցների հոսքերի մասին» ստանդարտում կատարվել են սահմանափակ փոփոխություններ, որոնք ներառում են անուղղակի մեթոդով պատրաստված հաշվետվության գործառնական գործունեությունից դրամական հոսքերի որոշման

մեկնարկային կետի փոփոխությունը «շահույթ կամ վնասից» «գործառնական շահույթ կամ վնաս» և շահաբաժիններից և տոկոսներից դրամական հոսքերի դասակարգման ընտրանքի վերացումը: Բացի այդ, կան հետևողական փոփոխություններ մի շարք այլ ՖՀՄ հաշվապահական հաշվառման ստանդարտներում:

ՖՀՄ 18-ը ուժի մեջ է 2027թ. հունվարի 1-ին կամ դրանից հետո սկսվող հաշվետու ժամանակաշրջանների համար՝ ավելի վաղ կիրառման հնարավորությամբ: ՖՀՄ 18-ը կկիրառվի հետևյալից՝ կիրառելով հատուկ անցումային դրույթներ:

Ընկերությունը ներկայումս գնահատում է ՖՀՄ 18-ի ազդեցությունը առանձին ֆինանսական հաշվետվությունների և առանձին ֆինանսական հաշվետվություններին կից ծանոթագրություններին վրա:

Դեկլարության գնահատմամբ չի ակնկալվում, որ այլ նոր ստանդարտները, փոփոխությունները և մեկնաբանությունները, որոնք չեն կիրառվել ընթացիկ տարում, էական ազդեցություն կունենան Ընկերության առանձին ֆինանսական հաշվետվությունների վրա:

- «Ֆինանսական գործիքների դասակարգման և չափման փոփոխություններ» (ՖՀՄ 9 և ՖՀՄ 7 փոփոխություններ) (ուժի մեջ է 2026թ. հունվարի 1-ին կամ դրանից հետո սկսվող հաշվետու ժամանակաշրջանների համար)
- «Բնությունից կախված էլեկտրաէներգիային հղումով պայմանագրեր» (ՖՀՄ 9 և ՖՀՄ 7 փոփոխություններ) (ուժի մեջ է 2026թ. հունվարի 1-ին կամ դրանից հետո սկսվող հաշվետու ժամանակաշրջանների համար)
- ՖՀՄ հաշվապահական հաշվառման ստանդարտների տարեկան բարեփոխումներ - Հատոր 11 (ուժի մեջ է 2026թ. հունվարի 1-ին կամ դրանից հետո սկսվող հաշվետու ժամանակաշրջանների համար)
- ՖՀՄ 19 «Դուստր ձեռնարկություններ առանց հանրային հաշվեկշիռականության բացահայտումներ» (ուժի մեջ է 2027թ. հունվարի 1-ին կամ դրանից հետո սկսվող հաշվետու ժամանակաշրջանների համար)

4 Հաշվապահական հաշվառման քաղաքականության էական հոդվածներ

4.1 Պատրաստման հիմքերը

Ընկերության առանձին ֆինանսական հաշվետվությունները պատրաստվել են համաձայն ՀՀՄՄ կողմից հրապարակված ՖՀՄ հաշվապահական հաշվառման ստանդարտների:

Առանձին ֆինանսական հաշվետվությունները պատրաստվել են սկզբնական արժեքի սկզբունքով:

4.2 Կլիմային առնչվող հարցեր

Ընկերությունը և նրա հաճախորդները ապագայում կարող են բախվել կլիմայի հետ կապված զգալի ռիսկերի: Այս ռիսկերը կարող են ֆինանսական կորուստների և անբարենպաստ ոչ ֆինանսական ազդեցությունների պատճառ հանդիսանալ, որոնք կարող են բխել կլիմայի փոփոխության քաղաքական, տնտեսական և բնապահպանական արձագանքներից: Կլիմայական ռիսկերի հիմնական աղբյուրները սահմանվել են որպես ֆիզիկական և անցումային ռիսկեր:

Ֆիզիկական ռիսկերն առաջանում են եղանակային կտրուկ իրադարձությունների հետևանքով, ինչպիսիք են փոթորիկները, ջրհեղեղները և անտառային հրդեհները, ինչպես նաև կլիմայական պայմանների երկարաժամկետ փոփոխությունները, ինչպիսիք են կայուն բարձր ջերմաստիճանը, ջերմային ալիքները, և երաշտը:

Անցումային ռիսկերը կարող են առաջանալ զրոյական արտանետումներով տնտեսության անցնելու հետևանքով, ինչպիսիք են օրենքների և կանոնակարգերի փոփոխությունները, դատավարությունները, որոնք կապված են չեղոքացման կամ հարմարվելու ձախողման հետ, և որոշակի ապրանքների,

արտադրանքների և ծառայությունների առաջարկի և պահանջարկի փոփոխությունների հետևանքով՝ կապված սպառողների վարքագծի և ներդրողների պահանջարկի փոփոխության հետ:

Այս ռիսկերը ստանում են աճող կարգավորիչ, քաղաքական և հասարակական վերահսկողություն ինչպես երկրի ներսում, այնպես էլ միջազգային մակարդակով: Թեև որոշ ֆիզիկական ռիսկեր կարող են կանխատեսելի լինել, կան զգալի անորոշություններ դրանց դրսևորման չափի և ժամանակի վերաբերյալ: Անցումային ռիսկերի առումով անորոշությունը պահպանվում է առաջիկա կարգավորող և քաղաքական փոփոխությունների, սպառողների պահանջարկի և մատակարարման շղթաների փոփոխությունների հետ կապված:

Ընկերությունը գիտակցում է հետագա ջանքերի անհրաժեշտությունը՝ կլիմայական գործոնները Ընկերության ռիսկերի կառավարման գնահատականներում և արձանագրություններում ամբողջությամբ ինտեգրելու գործում:

4.3 Արժույթ

Գործառնական և ներկայացման արժույթ

Հայաստանի Հանրապետության ազգային արժույթը հայկական դրամն է (<< դրամ), որն էլ հանդիսանում է Ընկերության գործառնական արժույթը, քանի որ այն լավագույնս արտացոլում է առանձին ֆինանսական հաշվետվությունների հիմքում ընկած իրադարձությունների և Ընկերության գործարքների տնտեսական բովանդակությունը:

Սույն առանձին ֆինանսական հաշվետվությունները ներկայացված են հայկական դրամով (եթե այլ բան նշված չէ), քանի որ, ղեկավարության համոզմամբ, այս արժույթն առավել կիրառելի է Ընկերության առանձին ֆինանսական հաշվետվություններն օգտագործողների համար: << դրամով ներկայացված ամբողջ ֆինանսական տեղեկատվությունը կլորացված է մինչև մոտակա հազար միավորը:

Արտարժույթով գործարքներ

Առանձին ֆինանսական հաշվետվություններ պատրաստելիս Ընկերության համար գործառնական արժույթից տարբեր այլ արժույթով իրականացված գործարքները գրանցվում են գործարքի օրվա դրությամբ Հայաստանի Հանրապետության կենտրոնական բանկի (<< ԿԲ) կողմից հրապարակված փոխարժեքով: Յուրաքանչյուր հաշվետու ամսաթվի դրությամբ արտարժույթով դրամային հոդվածները վերահաշվարկվում են՝ կիրառելով հաշվետու ամսաթվի դրությամբ << ԿԲ-ի կողմից հրապարակված փոխարժեքը:

	31 դեկտեմբերի 2025թ.	31 դեկտեմբերի 2024թ.
<< դրամ/1 ԱՄՆ դոլար	381.36	396.56
<< դրամ/1 եվրո	449.01	413.89

Ոչ դրամային հոդվածները չեն վերահաշվարկվում և չափվում են պատմական արժեքով (հաշվարկվում են՝ օգտագործելով գործարքի օրվա դրությամբ գործող փոխարժեքը):

4.4 Բիզնեսի միավորումներ և գույվիլ

Բոլոր ներդրումները հաշվառված են սկզբնական արժեքով: «ՔԱՐԴ Ագրոկրեդիտ» ՈՒՎԿ-ի նվիրատվությամբ ստացումը Ընկերության կողմից հաշվառվել է սկզբնական արժեքով՝ որի արդյունքում գույվիլ կամ ցածր արժեքով փոխանցումից եկամուտ չի առաջանում: Այս մեթոդի ընտրությունը պայմանավորված է այն հանգամանքով, որ երկու ընկերություններն էլ հանդիսանում են միևնույն խմբի անդամ և չունեն չվերահսկվող բաժնեմաս և գործարքի արդյունքում վերջնական վերահսկող կազմակերպության փոփոխություն տեղի չի ունեցել:

4.5 Հասույթ

Հասույթը ձևավորվում է հիմնականում ծառայությունների մատուցումից:

Որոշելու համար, թե արդյոք անհրաժեշտ է ճանաչել հասույթ, թե ոչ, Ընկերությունն առաջնորդվում է 5-քայլի գործընթացով.

1. Բացահայտել հաճախորդի հետ պայմանագիրը
2. Բացահայտել կատարման պարտականությունները
3. Որոշել գործարքի գինը
4. Բաշխել գործարքի գինը կատարման պարտականությունների միջև

Վարձակալությունից հասույթը ճանաչվում է ժամանակի ընթացքում, երբ Ընկերությունը բավարարում է կատարման իր պարտականությունը: Ծառայությունների մատուցումից հասույթը ճանաչվում է, երբ փաստացի մատուցված ծառայություններն ընդունվում են պատվիրատուի կողմից:

4.6 Հիմնական միջոցներ

Հիմնական միջոցները հաշվառվում են սկզբնական արժեքով՝ հանած կուտակված մաշվածությունը և արժեզրկումից կորուստները: Սկզբնական արժեքը ներառում է ձեռքբերման գինը, ներկրման տուրքերը, հարկերը, որոնք ենթակա չեն վերադարձման, և ուղղակիորեն վերագրվող ծախսումներ: Երբ հիմնական միջոցների միավորը բաղկացած է տարբեր օգտակար ծառայության ժամկետ ունեցող խոշոր բաղկացուցիչներից, դրանք հաշվառվում են որպես հիմնական միջոցի առանձին միավորներ:

Հիմնական միջոցի օտարման կամ դուրսգրման հետևանքով առաջացած օգուտը կամ վնասը որոշվում է վաճառքից հասույթի և ակտիվի հաշվեկշռային արժեքի տարբերությամբ և ճանաչվում է շահույթում կամ վնասում:

Հիմնական միջոցի՝ որպես առանձին ակտիվ հաշվառվող միավորի բաղկացուցիչ փոխարինման ծախսումները կապիտալացվում են դուրս գրված բաղկացուցիչի հաշվեկշռային արժեքի հետ: Այլ հետագա ծախսումները կապիտալացվում են միայն այն ժամանակ, երբ դրանք ավելացնում են հիմնական միջոցի միավորի հետ կապված ապագա տնտեսական օգուտները: Բոլոր այլ ծախսումները, ներառյալ պահպանման և վերանորոգման ծախսումները, ճանաչվում են շահույթում կամ վնասում՝ կատարվելու ժամանակաշրջանում:

Մաշվածությունը ճանաչվում է շահույթում կամ վնասում կամ ավելացվում է այլ ակտիվի սկզբնական արժեքին՝ կիրառելով գծային մեթոդը հիմնական միջոցի օգտակար ծառայության գնահատված ժամկետի ընթացքում: Մաշվածության հաշվարկը սկսվում է այն պահից, երբ ակտիվը դառնում է մատչելի՝ իր նպատակային նշանակությամբ օգտագործելու համար: Հիմնական միջոցների գնահատված օգտակար ծառայության ժամկետները ներկայացված են ստորև.

Շենքեր և շինություններ	- 20 տարի
Տրանսպորտային միջոցներ	- 5-8 տարի
Տնտեսական գույք	- 5-8 տարի
Այլ	- 5 տարի:

Քանի որ հողի համար հնարավոր չէ որոշել վերջավոր օգտակար ծառայության ժամկետ, համապատասխան հաշվեկշռային արժեքը չի ամորտիզացվում:

4.7 Ներդրումային գույք

Ներդրումային գույքն այն գույքն է, որը պահվում է վարձակալությունից եկամուտ վաստակելու և/կամ դրա արժեքի աճի համար, չափվում է սկզբնական արժեքով՝ հանած կուտակված մաշվածությունը և արժեզրկումից կորուստները:

Մաշվածությունը ճանաչվում է շահույթում կամ վնասում՝ կիրառելով գծային մեթոդը ներդրումային գույքի օգտակար ծառայության գնահատված ժամկետի ընթացքում, որը կազմում 14- 19 տարի: Մաշվածության

հաշվարկը սկսվում է այն պահից, երբ ակտիվը դառնում է մատչելի՝ իր նպատակային նշանակությամբ օգտագործելու համար:

Ներդրումային գույքից ստացված վարձակալական եկամուտը և գործառնական ծախսերը ներառված են համապատասխանաբար հասույթում և այլ ծախսերում:

4.8 Ֆինանսական գործիքներ

Ճանաչում և ապաճանաչում

Ֆինանսական ակտիվները և ֆինանսական պարտավորությունները ճանաչվում են, երբ Ընկերությունը դառնում է ֆինանսական գործիքի պայմանագրային կողմ:

Ֆինանսական ակտիվներն ապաճանաչվում են, երբ լրանում են ֆինանսական ակտիվից ակնկալվող դրամական հոսքերի նկատմամբ պայմանագրային իրավունքները, կամ այն ժամանակ, երբ ֆինանսական ակտիվները բոլոր նշանակալից ռիսկերով ու հատուցումներով փոխանցվում են երրորդ կողմին:

Ֆինանսական պարտավորություններն ապաճանաչվում են, երբ դրանք մարվում են, վճարման ենթակա չեն, չեղյալ են ճանաչվել կամ լրացել է դրանց ուժի մեջ լինելու ժամկետը:

Ֆինանսական ակտիվների դասակարգումը և սկզբնական չափումը

Բոլոր ֆինանսական ակտիվները սկզբնապես չափվում են իրական արժեքով՝ հաշվի առած գործարքի հետ կապված ծախսումները (որտեղ կիրառելի է), բացառությամբ այն առևտրային դեբիտորական պարտքերի, որոնք չեն պարունակում էական ֆինանսական բաղադրիչ և չափվում են գործարքի գնով՝ ՖՀՄ 15-ի պահանջներին համապատասխան:

Ֆինանսական ակտիվները, բացառությամբ հեջավորման գործիքների բաժանվում են հետևյալ կատեգորիաների.

- ամորտիզացված արժեքով չափվող,
- իրական արժեքով՝ շահույթի կամ վնասի միջոցով չափվող,
- իրական արժեքով՝ այլ համապարփակ արդյունքի միջոցով չափվող:

Դասակարգումը բնորոշվում է հետևյալ երկու պարագայով.

- Ընկերության՝ ֆինանսական ակտիվների կառավարման բիզնես մոդելը,
- ֆինանսական ակտիվի՝ պայմանագրային դրամական հոսքերի հատկանիշները:

Ֆինանսական ակտիվներին առնչվող ամբողջ եկամուտը և ծախսերը, որոնք ճանաչվում են շահույթում կամ վնասում, արտացոլված են ֆինանսական ծախսերում, ֆինանսական եկամուտում կամ փոխարժեքային տարբերությունից օգուտում կամ վնասում, բացառությամբ առևտրային դեբիտորական պարտքերի արժեզրկման, որն արտացոլված է այլ ծախսերում: Ընկերության ֆինանսական ակտիվները, ըստ կատեգորիաների ներկայացված են Ծանոթագրություն 19-ում:

Ֆինանսական ակտիվների հետագա չափումը

Ամորտիզացված արժեքով չափվող ֆինանսական ակտիվներ

Ֆինանսական ակտիվները հաշվառվում են ամորտիզացված արժեքով, եթե ակտիվները բավարարում են հետևյալ պայմաններին (և չեն դասակարգված որպես իրական արժեքով՝ շահույթի կամ վնասի միջոցով չափվող).

- դրանք պահվում են այն բիզնես մոդելի շրջանակներում, որի նպատակն է պահել ֆինանսական ակտիվները և հավաքագրել դրանց հետ կապված պայմանագրային դրամական հոսքերը,
- ֆինանսական ակտիվների պայմանագրային պայմաններն առաջացնում են դրամական հոսքեր, որոնք հանդիսանում են միայն մայր գումարի և չմարված մայր գումարի վրա հաշվարկված տոկոսների վճարումներ:

Սկզբնական ճանաչումից հետո այս ակտիվները չափվում են ամորտիզացված արժեքով՝ կիրառելով արդյունավետ տոկոսադրույքի մեթոդը: Այն դեպքերում, երբ զեղչման ազդեցությունն աննշան է, զեղչում չի կատարվում: Ֆինանսական գործիքների այս կատեգորիայում են դասակարգվում Ընկերության դրամական միջոցները և դրանց համարժեքները, ավանդները բանկերում, առևտրային դեբիտորական պարտքերը և տրամադրված փոխառությունները:

Ֆինանսական ակտիվների արժեզրկում

Ակնկալվող պարտքային կորուստները ճանաչելու համար ՖՀՄՍ 9-ում արժեզրկմանը ներկայացված պահանջներում օգտագործվում է ապագային առնչվող տեղեկատվություն՝ «Ակնկալվող պարտքային կորուստների մոդել»:

ՖՀՄՍ 9-ին համապատասխան՝ Ընկերությունը ճանաչում է ակնկալվող պարտքային կորուստների պահուստ՝ ամորտիզացված արժեքով չափվող ֆինանսական ակտիվների գծով: Ակնկալվող պարտքային կորուստները դրամական պակասությունների ներկա արժեքն են, որն իրենից ներկայացնում է պայմանագրին համապատասխան Ընկերությանը հասանելիք բոլոր պայմանագրային դրամական հոսքերի և Ընկերության կողմից ակնկալվող ստացվելիք դրամական հոսքերի միջև տարբերությունը: Դրամական պակասությունները զեղչվում են ակտիվի սկզբնական արդյունավետ տոկոսադրույքով (կամ պարտքային ռիսկով ճշգրտված արդյունավետ տոկոսադրույքով՝ գնված կամ սկզբնավորված պարտքային առումով արժեզրկված ֆինանսական ակտիվի համար):

ՖՀՄՍ 9-ի արժեզրկման պահանջների կիրառման մանրամասն վերլուծության համար տե՛ս Ծանոթագրություն 20.2-ը:

Ֆինանսական պարտավորությունների դասակարգումը և չափումը

Ընկերության ֆինանսական պարտավորությունները ներառում են վարկերը և փոխառությունները, առևտրային և այլ կրեդիտորական պարտքերը:

Ընկերության ֆինանսական պարտավորությունները, ըստ կատեգորիաների, ներկայացված են Ծանոթագրություն 19-ում:

Կապակցված կողմերին տրամադրված փոխառություններ

Կապակցված կողմերին տրամադրված փոխառությունները սկզբնապես ճանաչվում են իրական արժեքով՝ առանց գործարքային ծախսերի: Փոխառության իրական արժեքի և անվանական արժեքի տարբերությունը ձևակերպվում է շահույթում կամ վնասում:

Սկզբնական ճանաչումից հետո կապակցված կողմերին տրամադրված փոխառությունները չափվում են ամորտիզացված արժեքով, իսկ հաշվեկշռային արժեքի և մարման արժեքի միջև տարբերությունը փոխառության ժամկետի ընթացքում ճանաչվում է շահույթում կամ վնասում՝ արդյունավետ տոկոսադրույքի մեթոդով:

4.9 Դրամական միջոցներ և դրանց համարժեքներ

Դրամական միջոցները և դրանց համարժեքները ներառում են կանխիկ միջոցները, բանկային հաշիվների մնացորդները, դրամական միջոցները՝ ճանապարհին, ցպահանջ ավանդները, ինչպես նաև այլ կարճաժամկետ, բարձր իրացվելի ներդրումները, որոնց մարման ժամկետը ձեռքբերման օրից 90 օր է, որոնք հեշտ փոխարկվում են դրամական միջոցների՝ նախապես հայտնի գումարներով, և որոնց արժեքի փոփոխման ռիսկը նշանակալի չէ: Դրամական միջոցները և դրանց համարժեքները պահվում են կարճաժամկետ դրամական պարտավորությունները բավարարելու նպատակով, այլ ոչ թե ներդրման կամ այլ նպատակներով:

4.10 Ծնորհներ

Ծնորհը չի ճանաչվում, քանի դեռ չկա հիմնավորված երաշխիք, որ Ընկերությունը կատարելու է դրան կից բոլոր պայմանները, և որ շնորհը ստացվելու է:

Ծնորհները, որոնց հիմնական պայմանը Ընկերության կողմից ոչ ընթացիկ ակտիվներ գնելը, կառուցելը կամ այլ կերպ ձեռք բերելն է, ֆինանսական վիճակի մասին հաշվետվությունում ճանաչվում են որպես

հետաձգված եկամուտ և սիստեմատիկորեն փոխանցվում են շահույթ կամ վնաս՝ համապատասխան ակտիվի օգտակար ծառայության ժամկետի ընթացքում:

Այլ շնորհները ճանաչվում են սիստեմատիկ հիմունքով եկամուտ այն ժամանակաշրջանում, որի ընթացքում դրանք փոխհատուցում են համապատասխան ծախսումները, որոնց համար դրանք ստացվել են: Շնորհը, որը հատկացվում է Ընկերությանը՝ ի հատուցում արդեն կրած ծախսերի կամ վնասների, կամ որպես շտապ ֆինանսական օգնություն՝ առանց հետագա համապատասխան ծախսումներ կրելու, ճանաչվում է որպես եկամուտ այն հաշվետու ժամանակաշրջանում, երբ դառնում է ստացման ենթակա:

4.11 Շահութահարկ

Ընթացիկ հարկ

Ընթացիկ շահութահարկը տարվա համար հարկվող շահույթից վճարվելիք հարկն է՝ հաշվետու ամսաթվին գործող կամ ըստ էության գործող հարկային դրույքաչափերով՝ հաշվի առնելով նախորդ տարիների համար վճարվելիք հարկերի ճշգրտումները:

Հետաձգված հարկ

Հետաձգված հարկը հաշվարկվում է ակտիվների ու պարտավորությունների հաշվեկշռային արժեքների և շահութահարկի հաշվարկման ժամանակ օգտագործվող համապատասխան հարկային բազաների միջև ժամանակավոր տարբերություններից: Հետաձգված հարկային պարտավորությունները ճանաչվում են բոլոր հարկվող ժամանակավոր տարբերությունների համար: Հետաձգված հարկային ակտիվները պետք է ճանաչվեն բոլոր նվազեցվող ժամանակավոր տարբերությունների համար այն չափով, որքանով որ հավանական է հարկվող շահույթի ստացում, որի դիմաց կարող է օգտագործվել նվազեցվող ժամանակավոր տարբերությունը: Այսպիսի հետաձգված հարկային ակտիվներն ու պարտավորությունները չեն ճանաչվում, եթե ժամանակավոր տարբերությունն առաջանում է գույքի սկզբնական ճանաչումից կամ այլ ակտիվների և պարտավորությունների սկզբնական ճանաչումից այնպիսի գործարքում, որը գործարքի պահին չի ազդում ո՛չ հաշվապահական շահույթի, ո՛չ էլ հարկվող շահույթի վրա (բացի ձեռնարկատիրական գործունեության միավորումներից):

Հետաձգված հարկային ակտիվների հաշվեկշռային արժեքը վերանայվում է յուրաքանչյուր հաշվետու ժամանակաշրջանի վերջում և նվազեցվում է այն չափով, որով այլևս հավանական չէ, որ Ընկերությունը կստանա բավարար հարկվող շահույթ, որը թույլ կտա հետաձգված հարկային ակտիվից օգուտն ամբողջությամբ կամ մասամբ իրացնել:

Հետաձգված հարկային ակտիվներն ու պարտավորությունները չափվում են հարկերի այն դրույքների օգտագործմամբ, որոնց կիրառման մեջ լինելն ակնկալվում է ակտիվի իրացման կամ պարտավորության մարման ժամանակ՝ հիմք ընդունելով հարկերի այն դրույքները (և հարկային հարաբերություններ կարգավորող նորմատիվ իրավական ակտերը), որոնք ուժի մեջ են եղել կամ ըստ էության ուժի մեջ են եղել հաշվետու ժամանակաշրջանի վերջում: Հետաձգված հարկային պարտավորությունների և հետաձգված հարկային ակտիվների չափումն արտացոլում է հարկային հետևանքները, որոնք երևան են գալու կախված այն եղանակից, որով Ընկերությունը հաշվետու ամսաթվի դրությամբ ակնկալում է փոխհատուցել կամ մարել իր ակտիվների կամ պարտավորությունների հաշվեկշռային արժեքները:

4.12 Սեփական կապիտալ և շահաբաժիններ

Ընկերության կողմից թողարկվող կապիտալի գործիքները հաշվառվում են անվանական արժեքով:

Բաժնետիրական կապիտալն իրենից ներկայացնում է թողարկված բաժնետոմսերի անվանական արժեքը:

Կուտակված շահույթը ներառում է ընթացիկ և նախորդ ժամանակաշրջանների չբաշխված շահույթը:

Սեփականատերերի հետ բոլոր գործարքներն առանձին-առանձին գրանցված են սեփական կապիտալում:

Սեփական կապիտալի այլ տարրերն իրենցից ներկայացնում են մայր ընկերությունից անհատույց ստացված դուստր ընկերությունում ներդրումը՝ հանած գործարքին առընչվող հետաձգված հարկերը:

Շահաբաժինները ճանաչվում են որպես պարտավորություն այն ժամանակաշրջանում, երբ դրանք հայտարարվում են:

4.13 Հատուցումներ աշխատակիցներին

Կարճաժամկետ հատուցումներն աշխատակիցներին այն հատուցումներն են, որոնք ամբողջությամբ ենթակա են մարման տարեկան այն հաշվետու ժամանակաշրջանի ավարտից հետո տասներկու ամսվա ընթացքում, որում աշխատակիցները մատուցել են համապատասխան ծառայությունները: Դրանք ներառում են՝

- (ա) աշխատավարձերը և պարգևավճարները,
- (բ) վճարովի տարեկան արձակուրդները և անաշխատունակության հետ կապված վճարովի արձակուրդները,

Երբ աշխատակիցները հաշվետու ժամանակաշրջանի ընթացքում Ընկերությանը մատուցում են ծառայություններ, Ընկերությունն աշխատակիցների կարճաժամկետ հատուցումների չգեղջված գումարը, որն ակնկալվում է վճարել այդ ծառայությունների դիմաց, ճանաչում է՝

- (ա) որպես պարտավորություն (հաշվեգրված ծախս)՝ արդեն վճարված ցանկացած գումար հանելուց հետո: Եթե արդեն վճարված գումարը գերազանցում է հատուցումների չգեղջված գումարը, Ընկերությունը պետք է ճանաչի այդ տարբերությունը որպես ակտիվ (կանխավճարված ծախս)՝ այն չափով, որով կանխավճարը կհանգեցնի ապագա վճարումների կրճատման կամ դրամական միջոցների վերադարձի,
- (բ) որպես ծախս, եթե գումարը չի ներառվել այլ ակտիվի արժեքի մեջ:

Վճարովի բացակայություններ

Վճարովի բացակայությունների ձևով աշխատակիցների կարճաժամկետ հատուցումների գծով ակնկալվող ծախսումները ճանաչվում են հետևյալ կերպ.

- (ա) կուտակվող վճարովի բացակայությունների դեպքում՝ այն ժամանակ, երբ աշխատակիցները ծառայություն են մատուցում, որն ավելացնում է իրենց իրավունքներն ապագա վճարովի բացակայությունների նկատմամբ,
- (բ) չկուտակվող վճարովի բացակայությունների դեպքում՝ այն ժամանակ, երբ բացակայությունը տեղի է ունենում:

Պարգևավճարներ

Պարգևավճարների գծով ակնկալվող ծախսումները ճանաչվում են միայն այն ժամանակ, երբ Ընկերությունն ունի այդպիսի վճարումներ կատարելու ներկա իրավական կամ կառուցողական պարտականություն՝ որպես անցյալ դեպքերի արդյունք, և պարտականությունը հնարավոր է արժանահավատորեն գնահատել:

Ներկա պարտականություն գոյություն ունի այն և միայն այն դեպքում, երբ Ընկերությունը վճարում չկատարելու ոչ մի իրատեսական այլընտրանք չունի:

4.14 Հաշվապահական հաշվառման քաղաքականության կիրառման ընթացքում ղեկավարության կատարած նշանակալի դատողություններ և գնահատման անորոշություն

ՖՀՄՍ հաշվապահական հաշվառման ստանդարտներին համապատասխան առանձին ֆինանսական հաշվետվությունների պատրաստումը պահանջում է, որ Ընկերության ղեկավարությունը կարևոր գնահատումներ և ենթադրություններ կատարի, որոնք ազդեցություն են գործում առանձին ֆինանսական հաշվետվությունների ամսաթվի դրությամբ ակտիվների և պարտավորությունների գումարների, ինչպես նաև հաշվետու տարվա եկամուտների և ծախսերի գումարների վրա:

Ենթադրությունները և դատողությունները շարունակաբար գնահատվում են և հիմնված են պատմական փորձի, ինչպես նաև այլ ցուցանիշների վրա, ներառյալ ապագա ակնկալվող իրադարձությունները, որոնք տվյալ հանգամանքներում համարվում են իրատեսական:

4.14.1 Հաշվապահական հաշվառման քաղաքականության կիրառման ընթացքում կատարված նշանակալի դատողություններ

Ստորև ներկայացված են ղեկավարության՝ հաշվապահական հաշվառման քաղաքականության կիրառման ընթացքում կատարված դատողությունները, որոնք ամենաէական ազդեցությունն ունեն առանձին ֆինանսական հաշվետվությունների վրա:

Հետաձգված հարկային ակտիվների ճանաչումը

Այն չափը, որով կարող է ճանաչվել հետաձգված հարկային ակտիվ, կախված է այն հավանականության գնահատումից, թե արդյոք ապագայում հասանելի կլինի եկամուտ, որի դիմաց կիրացվեն նվազեցման ենթակա ժամանակավոր տարբերությունները և նախորդ ժամանակաշրջաններից բերված հարկային վնասը: Ի լրումն, անհրաժեշտ է էական դատողություն հարկային միջավայրում իրավական և տնտեսական սահմանափակումների և անորոշությունների գնահատման ժամանակ:

4.14.2 Գնահատման անորոշություն

Ընկերությունն իրականացնում է ապագային վերաբերող գնահատումներ և ենթադրություններ: Այդ հաշվապահական գնահատականները կարող են չհամապատասխանել իրական արդյունքներին: Ստորև ներկայացված են այն գնահատումներն ու ենթադրությունները, որոնց գծով առկա է ռիսկ, որ հաջորդ ֆինանսական տարում ակտիվների և պարտավորությունների հաշվեկշռային արժեքները կենթարկվեն էական ճշգրտումների:

Իրական արժեքի չափումը

Այն պարագայում, երբ գործող շուկաների տվյալները բացակայում են, ֆինանսական գործիքների իրական արժեքը որոշելու համար ղեկավարությունն օգտագործում է գնահատման մեթոդներ: Այս գործընթացն ընդգրկում է գնահատումների և ենթադրությունների մշակում, որոնք համահունչ են այն բանի հետ, թե ինչպես շուկայի մասնակիցները կգնահատեն գործիքը: Ղեկավարությունն իր ենթադրությունների համար որպես հիմք է վերցնում դիտելի տվյալները, սակայն այդպիսի տեղեկատվությունը միշտ չէ, որ հասանելի է: Այս պարագայում ղեկավարությունն օգտագործում է հասանելի լավագույն տեղեկատվությունը: Գնահատված իրական արժեքը կարող է տարբերվել հաշվետու ամսաթվի դրությամբ իրական գներից, որոնք կարող են ստացվել պարզաձև ձեռքի գործարքի պարագայում:

Գնահատման մեթոդների կիրառմամբ չափված (օրինակ՝ զեղչված դրամական հոսքերի մոդելներ) ֆինանսական գործիքների դեպքում ղեկավարությունն առավելագույնի է հասցնում դիտելի ելակետային տվյալների օգտագործումը: Այնուամենայնիվ, երբ այդպիսի տվյալները հասանելի չեն, կիրառվում են ոչ դիտելի ելակետային տվյալներ: Ենթադրությունների փոփոխությունները՝ ներառյալ շուկայական տոկոսադրույքները, կրեդիտային սփռեղները, իրացվելիության պայմանները կամ փոփոխականությունները, կարող են էական ազդեցություն ունենալ ճանաչված իրական արժեքների վրա:

Մաշվող ակտիվների օգտակար ծառայության ժամկետները և մնացորդային արժեքները

Ղեկավարությունը յուրաքանչյուր հաշվետու ամսաթվի դրությամբ վերանայում է մաշվող ակտիվների օգտակար ծառայության ժամկետների և մնացորդային արժեքների գնահատումները՝ հիմնվելով ակտիվների ակնկալվող օգտակարությունից: Այս գնահատումներում անորոշությունները կապված են տեխնոլոգիական հնության հետ, որը կարող է փոխել որոշակի ծրագրային ապահովման և SS սարքավորումների օգտակարությունը, ինչպես նաև բնապահպանական կանոնակարգերը, որոնք կարող են հանգեցնել աղտոտող ակտիվների ավելի արագ մաշվածությանը:

Մաշվող ակտիվների օգտակար ծառայության հետ կապված իրականացվել է վերանայում՝ հաշվի առնելով հաշվետու ամսաթվի դրությամբ հայտնի կլիմայական փոփոխությունը և շրջակա միջավայրի կանոնակարգերը: Վերանայման արդյունքում Ընկերության մաշվող ակտիվների հաշվեկշռային արժեքի վրա որևէ էական ազդեցություն չի հայտնաբերվել:

Մաշվող ակտիվների գնահատված օգտակար ծառայության ժամկետները վերանայվում են առնվազն տարեկան մեկ անգամ՝ հաշվի առնելով վերոհիշյալ գործոնները, ինչպես նաև համապատասխան կարևոր տեղեկությունները: Ղեկավարության համոզմամբ մաշվող ակտիվների գնահատված օգտակար ծառայության ժամկետներն էականորեն չեն տարբերվում այդ ակտիվների տնտեսական կյանքից: Եթե մաշվող ակտիվների փաստացի օգտակար ծառայության ժամկետները տարբերվեն գնահատումներից, ապա առանձին ֆինանսական հաշվետվությունները կարող են էականորեն տարբերվել:

Ֆինանսական ակտիվների գծով ակնկալվող պարտքային կորուստների պահուստ

Ընկերությունն օգտագործում է դատողություն՝ գնահատելու ամորտիզացված արժեքով ֆինանսական ակտիվների գծով ակնկալվող պարտքային կորուստների պահուստները: Ակնկալվող պարտքային կորուստները չափվում են անաչառ և հավանականության միջին կշռված գումարով, դրամի ժամանակային արժեքով և խելամիտ ու հիմնավորված տեղեկությամբ հաշվետու ժամանակաշրջանի դրությամբ՝ կապված անցյալ իրադարձությունների, ներկա պայմանների և ապագա տնտեսական պայմանների կանխատեսումների հետ:

Ընկերության առևտրային դեբիտորական պարտքերի գծով ակնկալվող պարտքային կորուստների վերաբերյալ տեղեկությունը բացահայտված է Ծանոթագրություն 20.2-ում:

5 Վարչական ծախսեր

	2025թ.	2024թ.
Հատուցում աշխատակիցներին	83,700	57,326
Հիմնական միջոցների և ներդրումային գույքի մաշվածության ծախս	5,590	5,191
Բանկային ծառայության և ապահովագրական ծախսեր	675	528
Աուդիտի և խորհրդատվական ծախսեր	9,893	4,963
Գործուղման և ներկայացուցչական ծախսեր	9,064	7,757
Այլ	8,477	3,228
	117,399	78,993

6 Ֆինանսական եկամուտ և ծախսեր

	2025թ.	2024թ.
Կարճաժամկետ բանկային ավանդներից տոկոսային եկամուտ	4,144	1,854
Ֆինանսական պարտավորությունների ներկա արժեքով ներկայացնելուց եկամուտ	-	21,262
Ֆինանսական ակտիվների զեղչման հակադարձումից եկամուտ	47,939	15,126
Տրամադրված փոխառություններից տոկոսային եկամուտ	32,906	13,344
Ընդամենը ֆինանսական եկամուտ	84,989	51,586
Տրամադրված փոխառությունների իրական արժեքի ճշգրտման ծախս	48,914	-
Ընդամենը ֆինանսական ծախսեր	48,914	-
Զուտ ֆինանսական եկամուտ	36,075	51,586

7 Շահութահարկի գծով փոխհատուցում

	2025թ.	2024թ.
Հետաձգված հարկ (տե՛ս Ծանոթագրություն 12)	4,160	38,183
Ընդամենը շահութահարկի գծով փոխհատուցում	4,160	38,183

Արդյունավետ հարկային դրույքաչափի համադրումը ներկայացված է ստորև.

	2025թ.	Արդյունավետ հարկային դրույքաչափ (%)	2024թ.	Արդյունավետ հարկային դրույքաչափ (%)
Շահույթ մինչև հարկումը (համաձայն ՖՀՄՍ հաշվապահական հաշվառման ստանդարտների)	325,096		305,974	
Շահութահարկ՝ 18% դրույքաչափով (2024թ.՝ 18%)	58,517	18%	55,075	18%
(Հարկվող եկամուտ) չնվազեցվող ծախսեր, զուտ	(57,693)	(18%)	(86,629)	(28%)
Զօգուագործված հարկային վնասներից չճանաչված հետաձգված հարկային ակտիվի ազդեցությունը	(4,984)	(2%)	(6,629)	(2%)
Շահութահարկի գծով փոխհատուցում	(4,160)	(2%)	(38,183)	(12%)

8 Ներդրումներ դուստր կազմակերպություններում

Ընկերությունն ունի սեփական կապիտալի բաժնեմասեր ստորև թվարկված կազմակերպություններում.

	31 դեկտեմբերի 2025թ.	31 դեկտեմբերի 2024թ.
«Կուլտիվա» ՓԲԸ	310,000	170,000
«Ագրիկոնցեպտ» ՓԲԸ	90,000	70,000
«ԱգրոՏրենդ» ՓԲԸ	240,000	80,000
«ՍմարթԱգրո» ՓԲԸ	105,000	105,000
«Քարդ ԱգրոԿրեդիտ» ՈՒԿ	604,500	620,100
	1,349,500	1,045,100

Դուստր կազմակերպություններում ներդրումների շարժն արտացոլված է ստորև.

	2025թ.	2024թ.
Տարեսկզբի մնացորդ	1,045,100	889,500
Ավելացում	320,000	155,600
Օտարում	(15,600)	-
Տարեվերջի մնացորդ	1,349,500	1,045,100

Ընկերությունը չի համախմբել դուստր ընկերությունների ֆինանսական հաշվետվությունները, քանի որ դրանք համախմբվել են վերջնական վերահսկող հանդիսացող «Ագրոբիզնես և գյուղի զարգացման

կենտրոն» հիմնադրամի համախմբված ֆինանսական հաշվետվություններում: Դուստր ընկերությունների վերաբերյալ մանրամասն տեղեկատվությունը ներկայացված է Ծանոթագրություն 2-ում:

Շահաբաժիններից եկամուտ

2025թ.-ի ընթացքում հայտարարվել են հետևյալ շահաբաժինները՝ Քարդ ԱգրոԿրեդիտ ՈՒՎԿ ՓԲԸ՝ 383,912 հազար դրամ (2024թ.-ին՝ 297,500 հազար դրամ), ԱգրիԿոնցեպտ ՓԲԸ՝ զրո (2024թ.-ին՝ 12,500 հազար դրամ):

9 Հիմնական միջոցներ

	Հոդ	Տրանսպորտային միջոցներ և տնտեսական գույք	Այլ	Ընդամենը
Սկզբնական արժեք				
2024թ. հունվարի 1-ի դրությամբ	45,791	8,598	1,095	55,484
Ավելացում	-	-	615	615
2024թ. դեկտեմբերի 31-ի դրությամբ	45,791	8,598	1,710	56,099
Ավելացում	-	2,175	-	2,175
Օտարում	-	(7,760)	-	(7,760)
2025թ. դեկտեմբերի 31-ի դրությամբ	45,791	3,013	1,710	50,514
Կուրակված մաշվածություն				
2024թ. հունվարի 1-ի դրությամբ	-	5,284	724	6,008
Տարվա հաշվարկ	-	647	322	969
2024թ. դեկտեմբերի 31-ի դրությամբ	-	5,931	1,046	6,977
Տարվա հաշվարկ	-	735	657	1,392
Օտարման հետևանքով դուրսգրում	-	(6,151)	-	(6,151)
2025թ. դեկտեմբերի 31-ի դրությամբ	-	515	1,703	2,218
Հաշվեկշռային արժեք				
2024թ. դեկտեմբերի 31-ի դրությամբ	45,791	2,667	664	49,122
2025թ. դեկտեմբերի 31-ի դրությամբ	45,791	2,498	7	48,296

Մաշվածության գծով ծախսը բաշխվել է իրացման ծախսերին 24 հազար << դրամ (2024 թ՝ զրո) և վարչական ծախսերին 1,368 հազար << դրամ (2024 թ՝ 969 հազար << դրամ):

10 Ներդրումային գույք

	2025թ.	2024թ.
Հաշվեկշռային արժեք		
Տարեսկզբի մնացորդ	52,125	56,347
Մաշվածության գծով տարվա հաշվարկ	(4,222)	(4,222)
Տարեվերջի մնացորդ	47,903	52,125

Մաշվածության ծախսը ներառված է վարչական ծախսերում:

11 Տրամադրված փոխառություններ

	31 դեկտեմբերի 2025թ.	31 դեկտեմբերի 2024թ.
Ոչ ընթացիկ		
Կապակցված կողմերին տրամադրված փոխառություններ	290,655	122,656
Ֆիզիկական անձանց տրամադրված փոխառություններ	156,596	-
Իրական արժեքի ճշգրտում	(43,947)	-
	403,304	122,656
Ընթացիկ		
Կապակցված կողմերին տրամադրված փոխառություններ	-	23,439
Ֆիզիկական անձանց տրամադրված փոխառություններ	14,515	-
	14,515	23,439
Ընդամենը տրամադրված փոխառություններ	417,819	146,095

Ընկերությունը տրամադրել է ֆիզիկական անձանց (Ընկերության և դուստր ընկերությունների աշխատակիցներին) անտոկոս փոխառություններ 7 տարի ժամկետով:

12 Հետաձգված հարկեր

Հետաձգված հարկերի շարժը ներկայացված է ստորև.

	2025թ.	2024թ.
Տարեսկզբի մնացորդ	(70,627)	(108,810)
Շահույթում կամ վնասում ճանաչված փոխհատուցում (տե՛ս Ծանոթագրություն 0)	4,160	38,183
Տարեվերջի մնացորդ	(66,467)	(70,627)

2025թ. դեկտեմբերի 31-ին ավարտված տարվա հետաձգված հարկերը խմբավորված են հետևյալ կերպ.

	1 հունվարի 2025թ.	Շահույթում կամ վնասում ճանաչված	31 դեկտեմբերի 2025թ.
Հետաձգված հարկային ակտիվներ			
Առևտրային դեբիտորական պարտքեր	14,200	(11,734)	2,466
Առևտրային կրեդիտորական պարտքեր	404	192	596
Տրամադրված փոխառություններ	-	7,910	7,910
Կուտակված հարկային վնաս	23,579	4,984	28,563
	38,183	1,352	39,535
Հետաձգված հարկային պարտավորություններ			
Ստացված նվիրատվություն (տե՛ս Ծանոթագրություն 15.3)	108,810	(2,808)	106,002
	108,810	(2,808)	106,002
Զուտ արդյունք - հետաձգված հարկային պարտավորություններ	(70,627)	4,160	(66,467)

2024թ. դեկտեմբերի 31-ին ավարտված տարվա հետաձգված հարկերը խմբավորված են հետևյալ կերպ.

	1 հունվարի 2024թ.	Շահույթում կամ վնասում ճանաչված	31 դեկտեմբերի 2024թ.
Հետաձգված հարկային ակտիվներ			
Առևտրային դեբիտորական պարտքեր	20,624	(6,424)	14,200
Առևտրային կրեդիտորական պարտքեր	719	(315)	404
Կուտակված հարկային վնաս	16,950	6,629	23,579
	38,293	(110)	38,183
Հետաձգված հարկային ակտիվի գնահատում	(38,293)	38,293	-
Հետաձգված հարկային պարտավորություններ			
Ստացված նվիրատվություն (տե՛ս Ծանոթագրություն 15.3)	108,810	-	108,810
	108,810	-	108,810
Զուտ արդյունք - հետաձգված հարկային պարտավորություններ	(108,810)	38,183	(70,627)

13 Առևտրային և այլ դեբիտորական պարտքեր

	31 դեկտեմբերի 2025թ.	31 դեկտեմբերի 2024թ.
Ֆինանսական ակտիվներ		
Առևտրային դեբիտորական պարտքեր	21,652	126,737
Պարտքային կորուստների համար պահուստ	(13,702)	(20,490)
Շահաբաժինների մասով դեբիտորական պարտքեր	-	12,500
	7,950	118,747
Ոչ ֆինանսական ակտիվներ		
Տրված կանխավճարներ	40	43
Կանխավճարված հարկեր	477	942
	517	985
Ընդամենը առևտրային և այլ դեբիտորական պարտքեր	8,467	119,732
Որից՝		
Ոչ ընթացիկ	-	89,601
Ընթացիկ	8,467	30,131

Ծառայությունների մատուցումից առաջացած առևտրային դեբիտորական պարտքի միջին տևողությունը կազմում է 152 օր (2024թ.՝ 515 օր): Առևտրային դեբիտորական պարտքերի գծով տոկոսներ չեն հաշվարկվում:

Ոչ ընթացիկ առևտրային և այլ դեբիտորական պարտքերի իրական արժեքները հետևյալն են.

	Հաշվեկշռային արժեք		Իրական արժեք	
	31 դեկտեմբերի 2025թ.	31 դեկտեմբերի 2024թ.	31 դեկտեմբերի 2025թ.	31 դեկտեմբերի 2024թ.
Առևտրային և այլ դեբիտորական պարտքեր կապակցված կողմերից	-	155,379	-	97,932
Այլ դեբիտորական պարտքեր	7,950	20,815	7,950	20,815
	7,950	176,194	7,950	118,747

Առևտրային և այլ դեբիտորական պարտքերի զուտ հաշվեկշռային արժեքը համարվում է իրական արժեքի խելամիտ գնահատում:

Կապակցված կողմերից երկարաժամկետ դեբիտորական պարտքը անտոկոս է և ներկայացված է իրական արժեքով՝ զեղչելով առնչվող դրամական միջոցների հոսքերը 12 տարվա ընթացքում՝ կիրառելով ԿԲ-ի տոկոսադրույքները՝ համանման ֆինանսական գործիքների ժամանակաշրջանի համար:

Ընկերության՝ համեմատական ժամանակաշրջանի բոլոր առևտրային և այլ դեբիտորական պարտքերը վերանայվել են արժեզրկման հայտանիշների առկայության ստուգման համար:

Ակնկալվող պարտքային կորուստի գծով պահուստի համադրումը ներկայացված է ստորև.

	2025թ.	2024թ.
Կորուստների գծով պահուստը, տարեսկզբի մնացորդ	20,490	27,182
Տարվա ընթացքում պահուստի հակադարձում	(6,788)	(6,692)
Կորուստների գծով պահուստը, տարեվերջի մնացորդ	13,702	20,490

Ծանոթագրություն 20.2-ում ներկայացված են պարտքային ռիսկի և ակնկալվող պարտքային ռիսկի վերլուծության վերաբերյալ բացահայտումները:

14 Դրամական միջոցներ և դրանց համարժեքներ

Դրամական հոսքերի մասին հաշվետվության նպատակով՝ դրամական միջոցները և դրանց համարժեքները ներառում են դրամական միջոցները դրամարկղում ու բանկերում և մինչև 3 ամիս մարման ժամկետ ունեցող կարճաժամկետ ներդրումները: Ֆինանսական տարվա վերջի դրությամբ դրամական հոսքերի մասին հաշվետվությունում ներկայացված դրամարկղում և բանկերում մնացորդները կարող են համադրվել ֆինանսական վիճակի մասին հաշվետվության հոգվածների հետ հետևյալ կերպ.

	31 դեկտեմբերի 2025թ.	31 դեկտեմբերի 2024թ.
Բանկային հաշիվներ	25,361	69,581
Կարճաժամկետ ներդրումներ	-	141,854
Ընդամենը դրամական միջոցներ և դրանց համարժեքներ	25,361	211,435

Տե՛ս Ծանոթագրություն 20.1՝ դրամական միջոցների և դրանց համարժեքների արժույթների բացահայտման համար:

15 Սեփական կապիտալ

15.1 Բաժնետիրական կապիտալ

Բաժնետոմսերի քանակը, եթե այլ բան նշված չէ

	Սովորական բաժնետոմսեր	Սովորական բաժնետոմսեր
	2025թ.	2024թ.
Հայտարարված բաժնետոմսեր		
Սովորական բաժնետոմսերի քանակը, յուրաքանչյուրը՝ 600,000 դրամ	450	450

Ընկերությունն ունի սովորական բաժնետոմսերի մեկ դաս, որը հաստատուն եկամտի նկատմամբ իրավունք չունի:

15.2 Շահաբաժիններ

2025թ. ընթացքում հայտարարվել է 80,000 հազար << դրամ, իսկ վճարվել է 79,000 հազար << դրամ շահաբաժին, իսկ 2024թ. ընթացքում հայտարարվել է 40,000 հազար << դրամ և վճարվել՝ 36,000 հազար << դրամ շահաբաժին:

15.3 Այլ տարրեր

2022թ. հունիսի 28-ին կնքված նվիրատվության պայմանագրի համաձայն՝ «Ագրովիժն» և գյուղական զարգացման կենտրոն» հիմնադրամը «Ագրովիժն» ՓԲԸ-ին նվիրաբերել է ունիվերսալ կրեդիտային կազմակերպություն «ՔԱՐԴ Ագրոկրեդիտ» ՓԲԸ-ում ունեցած իր բաժնետոմսերի 100%-ը: Բաժնետոմսերի արժեքը կազմել է 604,500 հազար << դրամ: Ստացված նվիրատվությունը՝ նվազեցված համապատասխան հետաձգված հարկային պարտավորությունների չափով, ճանաչվել է Ընկերության սեփական կապիտալում՝ որպես այլ տարրեր: Ընկերությունը «ՔԱՐԴ Ագրոկրեդիտ» ՓԲԸ ՈԻԿԿ-ի բաժնետոմսերի փոխանցումը հաշվառել է դրա ինքնարժեքով, որի արդյունքում ոչ գույքի, ոչ էլ շահույթ արտոնյալ գնով ձեռքբերումից չի ճանաչվել: Նշված հաշվառման մեթոդը ընտրվել է այն պատճառով, որ երկու ընկերություններն էլ հանդիսանում են նույն խմբի անդամներ, չունեն ոչ վերահսկվող բաժնեմասեր, և գործարքի արդյունքում վերջնական վերահսկող կողմը չի փոխվել:

16 Առևտրային և այլ կրեդիտորական պարտքեր

	31 դեկտեմբերի 2025թ.	31 դեկտեմբերի 2024թ.
Ֆինանսական պարտավորություններ		
Առևտրային կրեդիտորական պարտքեր	1,958	1,752
Վճարվելիք շահաբաժիններ	5,000	4,000
Վճարվելիք հատուցումներ աշխատակիցներին	3,313	2,244
	10,271	7,996
Ոչ ֆինանսական պարտավորություններ		
Հաճախորդներից կանխավճարներ	118	109
Վճարվելիք հարկեր և պարտավորություններ	3,177	780
	3,295	889
Ընդամենը առևտրային և այլ կրեդիտորական պարտքեր	13,566	8,885

Առևտրային կրեդիտորական պարտքերի գծով տոկոսներ չեն հաշվարկվում: Ընկերությունն ունի ֆինանսական ռիսկի կառավարման քաղաքականություն, որն ապահովում է բոլոր պարտավորությունների ժամանակին կատարում:

17 Կապակցված կողմեր

Ընկերության կապակցված կողմերը ներառում են մայր ընկերությունը, դուստր ընկերությունները, ինչպես նաև հիմնական ղեկավար անձնակազմը, ինչպես նկարագրված է ստորև:

17.1 Վերահսկողություն

Ընկերությունը վերահսկվում է «Ագրոբիզնեսի և գյուղի զարգացման կենտրոն» հիմնադրամի կողմից, որին պատկանում է Ընկերության բաժնետոմսերի 100% և որը հանդիսանում է վերջնական վերահսկող կողմ:

«Ագրոբիզնեսի և գյուղի զարգացման կենտրոն» հիմնադրամը գործունեություն է ծավալում Հայաստանի Հանրապետությունում, գտնվում է ք. Երևան, Ազատության փողոց 1/21-40 հասցեում և հրապարակում է համախմբված ֆինանսական հաշվետվություններ: Ընկերության վերահսկող մարմին է հանդիսանում բաժնետերերի ժողովը:

17.2 Գործարքներ կապակցված կողմերի հետ

Հաշվետու տարվա ընթացքում Ընկերության և իր կապակցված կողմերի միջև իրականացվել են հետևյալ գործարքները, և հաշվետու ամսաթվի դրությամբ մնացորդները հետևյալն են:

Գործարքներ

	2025թ.	2024թ.
Մայր ընկերություն		
Ծառայությունների ձեռքբերում	180	-
Ծառայությունների մատուցում	4,347	6,465
Վճարման ենթակա շահաբաժինների հայտարարում	80,000	40,000
Դուստր ընկերություններ		
Ծառայությունների մատուցում	2,009	1,673
Ծառայությունների ձեռքբերում	1,858	140
Ստացման ենթակա շահաբաժինների հայտարարում	383,912	310,000
Ստացված փոխառություններ	26,250	-
Տրամադրված փոխառություններ	193,600	74,489
Տրամադրված փոխառությունների մարում	49,020	6,000
Կապիտալի համալրում	304,400	155,600
Տոկոսային եկամուտ	27,945	23,675
Այլ	426	-
Ղեկավար անձնակազմ		
Աշխատավարձ և պարգևատրումներ	63,917	42,343
Ծառայությունների ձեռքբերում	38,288	28,505
Տրամադրված փոխառություններ	115,288	-
Տրամադրված փոխառությունների մարում	5,962	-
Դուստր ընկերությունների բաժնետոմսերի վաճառք	9,817	-

Գործարքներ

	2025թ.	2024թ.
Մնացորդներ	2025թ.	2024թ.
Մայր ընկերություն		
Կրեդիտորական պարտքեր	5,000	4,000
Դուստր ընկերություններ		
Առևտրային և այլ դեբիտորական պարտքեր	1,244	160,585
Տրամադրված փոխառություններ	290,655	145,451
Ստացված փոխառություններ	26,250	-
Կապիտալի համալրում	1,349,500	1,045,100
Կրեդիտորական պարտքեր	46	-
Ղեկավար անձնակազմ		
Տրամադրված փոխառություններ	109,326	-

18 Պայմանականություններ

18.1 Ապահովագրություն

Հայաստանում ապահովագրական համակարգը զարգացման փուլում է, և ապահովագրության շատ տեսակներ, որոնք լայնորեն տարածված են մյուս երկրներում, Հայաստանում դեռ չեն կիրառվում: Ընկերությունը չունի ամբողջական ապահովագրական ծածկույթ իր ակտիվների և գործունեության ընդհատման համար, չունի նաև Ընկերության գույքի կամ գործառնությունների հետ կապված պատահարների հետևանքով գույքին կամ շրջակա միջավայրին հասցված վնասի գծով երրորդ կողմի նկատմամբ պարտավորությունների ապահովագրություն: Քանի դեռ Ընկերությունը համապատասխան ձևով ապահովագրված չէ, գոյություն ունի ռիսկ, որ որոշակի ակտիվների կորուստը կամ ոչնչացումը կարող է անբարենպաստ նյութական ազդեցություն ունենալ Ընկերության գործունեության և ֆինանսական վիճակի վրա:

18.2 Հարկեր

Հայաստանի Հանրապետության հարկային օրենսդրությունը հաճախակի ենթարկվում է փոփոխությունների, ինչը որոշ դեպքերում մեկնաբանությունների կարիք է առաջացնում: Հաճախ տարբեր հարկային և իրավասու մարմիններ տարբեր մեկնաբանություններ ունեն: Հարկերը հարկային մարմինների կողմից ենթակա են վերանայման և ուսումնասիրության: Հարկային մարմիններն օրենքով լիազորված են տուգանքներ և տույժեր առաջադրել:

Վերոհիշյալ հանգամանքները Հայաստանում կարող են առաջացնել ավելի մեծ հարկային ռիսկեր, քան այլ երկրներում: Ղեկավարությունը համոզված է, որ հարկային պարտավորությունների գծով կատարել է համապատասխան հատկացումներ հարկային օրենսդրության իրենց մեկնաբանության հիման վրա: Այնուամենայնիվ, հարկային մարմինների մեկնաբանությունները կարող են տարբերվել, և դրանց ազդեցությունը կարող է զգալի լինել:

18.3 Շրջակա միջավայրի հետ կապված խնդիրներ

Ղեկավարությունը համոզված է, որ Ընկերությունը բավարարում է շրջակա միջավայրի հետ կապված Կառավարության պահանջները և վստահ է, որ Ընկերությունը շրջակա միջավայրի հետ կապված ընթացիկ էական պարտավորություններ չունի: Այնուամենայնիվ, Հայաստանում շրջակա միջավայրի

վերաբերյալ օրենսդրությունը զարգացման փուլում է, և դրա հավանական փոփոխություններն ու օրենսդրության մեկնաբանություններն ապագայում կարող են էական պարտավորություններ առաջացնել:

19 Ֆինանսական ակտիվներ և պարտավորություններ

Ֆինանսական գործիքների կատեգորիաները

Ֆինանսական ակտիվի և ֆինանսական պարտավորության յուրաքանչյուր դասի համար կիրառված հաշվապահական հաշվառման քաղաքականությունը և ընդունված մեթոդների մանրամասները, ինչպես նաև եկամտի և ծախսերի ճանաչման չափանիշներն ու հիմքերը ներկայացված են Ծանոթագրություն 4.8-ում: Ֆինանսական ակտիվների և պարտավորությունների հաշվեկշռային արժեքներն ըստ կատեգորիաների ներկայացված են ստորև:

Ֆինանսական ակտիվներ

	31 դեկտեմբերի 2025թ.	31 դեկտեմբերի 2024թ.
Ամորտիզացված արժեքով չափվող ֆինանսական ակտիվներ		
Առևտրային և այլ դեբիտորական պարտքեր	7,950	118,747
Տրամադրված փոխառություններ	417,819	146,095
Դրամական միջոցներ և դրանց համարժեքներ	25,361	211,435
Ընդամենը ամորտիզացված արժեքով չափվող ֆինանսական ակտիվներ	451,130	476,277
Ընդամենը ֆինանսական ակտիվներ	451,130	476,277

Ֆինանսական պարտավորություններ

	31 դեկտեմբերի 2025թ.	31 դեկտեմբերի 2024թ.
Ամորտիզացված արժեքով պահվող ֆինանսական պարտավորություններ		
Փոխառություններ	26,250	-
Առևտրային և այլ կրեդիտորական պարտքեր	10,271	7,996
Ընդամենը ամորտիզացված արժեքով չափվող ֆինանսական պարտավորություններ	36,521	7,996
Ընդամենը ֆինանսական պարտավորություններ	36,521	7,996

Ընկերության ֆինանսական գործիքների ռիսկերի նկարագրությունը՝ ներառյալ ռիսկի կառավարման նպատակները և քաղաքականությունը, արտացոլված են Ծանոթագրություն 20-ում:

Իրական արժեքով հաշվառվող ֆինանսական ակտիվները և ֆինանսական պարտավորությունները չափելիս օգտագործված մեթոդները նկարագրված են Ծանոթագրություն 21.1-ում:

20 Ֆինանսական գործիքների ռիսկ

Ռիսկի կառավարման քաղաքականությունը և նպատակները

Ֆինանսական գործիքների հետ կապված՝ Ընկերությունը ենթարկվում է զանազան ռիսկերի: Այս ռիսկերն են շուկայական ռիսկը, պարտքային ռիսկը և իրացվելիության ռիսկը:

20.1 Շուկայական ռիսկի վերլուծություն

Ֆինանսական գործիքների օգտագործման ընթացքում Ընկերությունը ենթարկվում է շուկայական ռիսկի, հատկապես՝ արտարժույթային ռիսկի:

Արտարժույթի ռիսկ

Ընկերությունը գործարքներ է իրականացնում արտարժույթով և, հետևաբար, ենթարկվում է արտարժույթի փոխարժեքային տատանումների ազդեցությանը:

Ընկերության գործարքների հիմնական մասն իրականացվում է հայկական դրամով: Արտարժույթի փոխարժեքային տատանումներից կախվածությունն առաջանում է Ընկերության՝ տրամադրած փոխառություններից, որոնք արտահայտված են ԱՄՆ դոլարով:

Արտարժույթով արտահայտված ֆինանսական ակտիվներն ու պարտավորությունները, որոնք Ընկերությանը ենթարկվում են արտարժույթային ռիսկի, նկարագրված են ստորև: Արտացոլված գումարները փոխարկվում են հայկական դրամի՝ հաշվետու ժամանակաշրջանի վերջի ամսաթվի փոխարժեքով:

Հոդված

31 դեկտեմբերի 2025թ.	ԱՄՆ դոլար	Եվրո
Ֆինանսական ակտիվներ		
Տրամադրված փոխառություններ	38,136	-
Դրամական միջոցներ և դրանց համարժեքներ	228	8
Ընդամենը ֆինանսական ակտիվներ	38,364	8
Զուտ արդյունք	38,364	8

Հոդված

31 դեկտեմբերի 2024թ.	ԱՄՆ դոլար	Եվրո
Ֆինանսական ակտիվներ		
Տրամադրված փոխառություններ	39,636	-
Դրամական միջոցներ և դրանց համարժեքներ	237	1
Ընդամենը ֆինանսական ակտիվներ	39,873	1
Զուտ արդյունք	39,873	1

Ստորև բերված աղյուսակում ներկայացված է Ընկերության զգայունությունը՝ ԱՄՆ դոլարի նկատմամբ դրամի 5% (2024թ.՝ 10%) աճին/նվազմանը: 5%-ը ղեկավարության կողմից գնահատված փոխարժեքի հավանական փոփոխությունն է: Զգայունության վերլուծությունը ներառում է միայն արտարժույթով արտահայտված դրամային հոդվածների մնացորդները և ժամանակաշրջանի վերջում ճշգրտում է դրանց փոխարկումը՝ փոփոխելով փոխարժեքը 5%-ով:

Դրամի արժևորումն ԱՄՆ դոլարի և եվրոյի նկատմամբ 5%-ով (2024թ.՝ 10%) կունենա հետևյալ ազդեցությունը:

	ԱՄՆ դոլարի ազդեցություն	
	2025թ.	2024թ.
Շահույթ կամ վնաս	1,918	3,987

20.2 Պարտքային ռիսկի վերլուծություն

Պարտքային ռիսկն առաջանում է այն դեպքում, երբ պայմանագրային գործընկերը չի կատարում իր պարտավորությունները, որի հետևանքով Ընկերությունը կարող է ֆինանսական կորուստներ կրել:

Խմբի ղեկավարությունը զգուշորեն կառավարում է պարտքային ռիսկը: Պարտքային ռիսկը կառավարվում է խմբային հիմունքով՝ ելնելով Ընկերության պարտքային ռիսկի կառավարման քաղաքականությունից և ընթացակարգերից: Ռիսկերի կառավարման նպատակով պարտքային ռիսկի գնահատումը ներառում է մոդելների օգտագործում, քանի որ ռիսկը տատանվում է՝ կախված շուկայական պայմաններից, դրամական միջոցների ակնկալվող հոսքերից և ժամանակի ընթացքից:

Ակնկալվող պարտքային կորուստների մոտեցումն օգտագործում է երեք փուլ՝ արժեզրկումից կորուստների բաշխման համար:

Փուլ 1. Ակնկալվող պարտքային կորուստներ հաջորդ տասներկու ամսվա ընթացքում

Փուլ 1-ը ներառում է բոլոր այն պայմանագրերը, որոնց սկզբնական ճանաչումից ի վեր պարտքային ռիսկի նշանակալի աճ չկա, և սովորաբար պարունակում է նոր պայմանագրեր, որոնք ժամկետանց են 31 օրից պակաս: Ճանաչվում է ակնկալվող պարտքային կորուստների այն մասը, որը վերաբերում է պարտագանցման դեպքերին, որոնք հնարավոր են առաջիկա 12 ամիսների ընթացքում:

Փուլ 2. գործողության ամբողջ ժամանակահատվածի ընթացքում ակնկալվող պարտքային կորուստներ – պարտքային արժեզրկման բացակայություն

Եթե ֆինանսական ակտիվը սկզբնական ճանաչումից ի վեր ունի պարտքային ռիսկի զգալի աճ, սակայն դեռևս պարտքային արժեզրկում չի եղել, այն տեղափոխվում է փուլ 2 և չափվում գործողության ամբողջ ժամանակահատվածի ընթացքում ակնկալվող պարտքային կորստի ժամանակ: Սա սահմանվում է որպես ակնկալվող պարտքային կորուստ, որը բխում է ֆինանսական գործիքի ակնկալվող գործողության ժամանակահատվածի ընթացքում բոլոր հնարավոր պարտագանցման դեպքերից:

Ամեն դեպքում, Ընկերությունը գտնում է, որ տեղի է ունեցել պարտքային ռիսկի զգալի աճ, երբ պայմանագրային վճարումը ժամկետանց է ավելի քան 31 օր:

Փուլ 3. գործողության ամբողջ ժամանակահատվածի ընթացքում ակնկալվող պարտքային կորուստներ – պարտքային արժեզրկման առկայություն

Եթե ֆինանսական ակտիվը սահմանվում է որպես պարտքային առումով արժեզրկված կամ պարտագանցման վիճակում գտնվող, այն տեղափոխվում է փուլ 3 և չափվում է գործողության ժամանակահատվածի ընթացքում ակնկալվող պարտքային կորստի ժամանակ: Պարտքային առումով արժեզրկված ֆինանսական ակտիվի օբյեկտիվ ապացույցները ներառում են 90 ժամկետանց օր, ինչպես նաև այլ տեղեկություններ, որոնք ցույց են տալիս պայմանագրային գործընկերոջ նշանակալի ֆինանսական դժվարությունները: Ընկերությունը ֆինանսական ակտիվը համարում է պարտագանցման վիճակում, երբ հավանական չէ, որ պայմանագրային գործընկերն ամբողջությամբ կվճարի Ընկերության նկատմամբ իր վարկային պարտավորությունները՝ առանց Ընկերության կողմից այնպիսի գործողությունների դիմելու, ինչպիսին է երաշխիքի իրացումը (եթե այդպիսիք կան):

Այն հանգամանքի որոշելը, թե արդյոք ֆինանսական ակտիվը կրել է պարտքային ռիսկի նշանակալի աճ, թե ոչ, հիմնված է պարտագանցման հավանականության գնահատման վրա, որը կատարվում է առնվազն ամսական մեկ անգամ՝ ներառելով արտաքին վարկանիշային տոկոսադրույքի վերաբերյալ տեղեկությունը, ինչպես նաև ֆինանսական ակտիվի պարտքային որակի վերաբերյալ ներքին տեղեկությունը: Ֆինանսական կազմակերպություններից դեբիտորական պարտքեր չհանդիսացող ֆինանսական ակտիվների համար պարտքային ռիսկի զգալի աճը գնահատվում է հիմնականում ժամկետանց տեղեկությունների հիման վրա:

Պարտքային ռիսկի առավելագույն ազդեցությունը ներկայացված է հետևյալ ֆինանսական ակտիվների հաշվեկշռային արժեքներով՝

	31 դեկտեմբերի 2025թ.	31 դեկտեմբերի 2024թ.
Ամորտիզացված արժեքով չափվող ֆինանսական ակտիվներ		
Տրամադրված փոխառություններ	417,819	146,095
Առևտրային դեբիտորական պարտքեր	7,950	118,747
Դրամական միջոցներ և դրանց համարժեքներ	25,361	211,435
Ընդամենը ֆինանսական ակտիվներ	451,130	476,277

Առևտրային դեբիտորական պարտքեր

Պարտքային ռիսկի գծով կենտրոնացումը սահմանափակ է՝ Ընկերության հաճախորդների բազայի մեծության և միմյանց հետ կապակցված չլինելու պատճառով:

Ընկերությունը բոլոր առևտրային դեբիտորական պարտքերի համար կիրառում է ՖՀՄՍ 9-ի պարզեցված մոդելը. «գործողության ամբողջ ժամանակահատվածի ընթացքում ակնկալվող պարտքային կորուստների ճանաչում», քանի որ այս դեբիտորները չեն պարունակում էական ֆինանսական բաղադրիչ:

Ակնկալվող պարտքային կորուստները չափելիս առևտրային դեբիտորական պարտքերը գնահատվել են հավաքական հիմունքով, քանի որ դրանք ունեն պարտքային ռիսկի ընդհանուր բնորոշումներ: Դրանք խմբավորվել են՝ ելնելով նմանատիպ կորստի ձևերով հաճախորդների տարբեր սեգմենտների խմբավորման ժամկետանց օրերից: Ակնկալվող կորուստների դրույքաչափերը հաշվարկվել են՝ հիմնվելով նախորդ տարվա վաճառքի դիմաց ստացված վճարումների պատկերի վրա, ինչպես նաև հաշվի առնելով այդ ժամանակամիջոցում ձևավորված պատմական պարտքային կորուստները: Այս պատմական դրույքաչափերը ճշգրտվում են, որպեսզի արտացոլեն ընթացիկ և ապագային վերաբերող մակրոտնտեսական գործոններին, որոնք ազդեցություն ունեն հաճախորդի՝ չվճարված մնացորդը մարելու կարողության վրա: Այնուամենայնիվ, հաշվի առնելով պարտքային ռիսկի կարճաժամկետ բնույթը՝ այս մակրոտնտեսական գործոնների ազդեցությունը հաշվետու ժամանակաշրջանում էական չի:

Երբ հավանական չէ առևտրային դեբիտորական պարտքերի հավաքագրումը, դրանք դուրս են գրվում (ապաճանաչվում են): Վճարում չկատարելը և Ընկերության հետ այլընտրանքային վճարման վերաբերյալ համաձայնության չգալը համարվում է գումարի վերադարձման վերաբերյալ խելամիտ սպասումներ չունենալու համար հայտանիշ:

Ընկերության ղեկավարությունը վերանայում է առևտրային դեբիտորական պարտքերի մնացորդների ժամկետային վերլուծությունը, բացառությամբ ֆինանսական հաստատություններից ստացված դեբիտորական պարտքերի, և հետևում է ժամկետանց մնացորդներին:

Ելնելով վերը նկարագրվածից՝ առևտրային դեբիտորական պարտքերի գծով ակնկալվող պարտքային կորուստների մնացորդները ներկայացված են հետևյալ աղյուսակներում.

	Ակնկալվող պարտքային կորուստ	Համախառն հաշվեկշռային արժեք	Գործողության ամբողջ ժամանակա- հատվածի ընթացքում ակնկալվող պարտքային կորուստների ճանաչում
1 ամսից 6 ամիս	63,3%	21,652	13,702
	63,3%	21,652	13,702

31 դեկտեմբերի 2024թ.

	Ակնկալվող պարտքային կորուստ	Համախառն հաշվեկշռային արժեք	Գործողության ամբողջ ժամանակա- հատվածի ընթացքում ակնկալվող պարտքային կորուստների ճանաչում
Մինչև 1 ամիս	-	16,645	-
1 տարուց ավելի	16.7%	110,092	20,490
	16.7%	126,737	20,490

Ղեկավարության համոզմամբ անհուսալի և կասկածելի դեբիտորական պարտքերի գծով սովորական պահուստից առավել այլ պարտքային ռիսկի պահուստ չի պահանջվում:

Տրամադրված փոխառություններ

Ղեկավարությունը եզրակացրել է, որ սկզբնական ճանաչումից հետո կապակցված կողմերին տրամադրված փոխառությունների գծով պարտքային ռիսկի զգալի աճ չկա: Ֆիզիկական անձանց տրամադրված փոխառություններ ապահովված են այլ ընկերությունում իրենց պատկանող բաժնետոմսերով:

Բանկային մնացորդներ և կարճաժամկետ ներդրումներ

Բանկային մնացորդների և ավանդների մասով պարտքային ռիսկը կառավարվում է գումարները բարձր վարկանիշ ունեցող ֆինանսական հաստատություններում պահելու միջոցով:

S&P միջազգային վարկանիշներ	31 դեկտեմբերի 2025թ.	31 դեկտեմբերի 2024թ.
BB-	25,361	211,435
Ընդամենը	25,361	211,435

20.3 Իրացվելիության ռիսկի վերլուծություն

Իրացվելիության ռիսկն այն ռիսկն է, որ Ընկերությունն ի վիճակի չի լինի մարել իր պարտավորվածությունները:

Ընկերությունը վարում է իրացվելիության կառավարման քաղաքականություն՝ դրամարկղում և բանկային հաշիվներում պահելով բավարար միջոցներ, ինչպես նաև պահելով բարձր իրացվելիություն ունեցող ակտիվներ՝ գործառնական պարտավորությունները ժամանակին մարելու նպատակով:

Հետևյալ աղյուսակում ներկայացված է Ընկերության ոչ ածանցյալ ֆինանսական պարտավորությունների գծով պայմանագրային մնացյալ մարման ժամկետները: Աղյուսակը պատրաստված է ֆինանսական պարտավորությունների չգեղջված դրամական հոսքերի հիման վրա՝ հաշվի առնելով ամենավաղ ամսաթիվը, երբ Ընկերությունը ստիպված կլինի մարել այդ պարտավորությունները: Աղյուսակը ներառում է տոկոսների և մայր գումարի գծով դրամական հոսքերը:

2025թ.	Անտոկու	Ընդամենը
Միջին կշռված արդյունավետ տոկոսադրույք (%)		
Մինչև 6 ամիս	10,271	10,271
6 ամսից մինչև 1 տարի	26,250	26,250
	36,521	36,521

2024թ.	Անտոկոս	Ընդամենը
Միջին կշռված արդյունավետ տոկոսադրույք (%)	-	-
Մինչև 6 ամիս	7,996	7,996
	7,996	7,996

Ընկերությունն իրացվելիության դիսկի գնահատման և կառավարման ժամանակ հաշվի է առնում ֆինանսական ակտիվներից ակնկալվող դրամային հոսքերը, մասնավորապես՝ դրամական միջոցները և առևտրային դեբիտորական պարտքերը:

21 Իրական արժեքի չափում

Ընկերությունը սկզբնական ճանաչումից հետո իրական արժեքով չափվող ակտիվները և պարտավորությունները դասակարգում է 1-ից մինչև 3-րդ մակարդակներում՝ հիմնվելով իրական արժեքի դիտարկելիության աստիճանի վրա: Այս երեք մակարդակները ներկայացված են ստորև.

- 1-ին մակարդակ՝ իրական արժեքները ստացվում են նմանատիպ ակտիվների կամ պարտավորությունների ակտիվ շուկաներում գնանշվող գներից (չճշգրտված),
- 2-րդ մակարդակ՝ իրական արժեքները ստացվում են 1-ին մակարդակում ներառված գնանշվող գներից տարբեր այլ ելակետային տվյալներից, որոնք ակտիվի կամ պարտավորության գծով դիտարկվում են կամ ուղղակիորեն (այսինքն՝ որպես գներ), կամ անուղղակիորեն (այսինքն՝ գների հիման վրա ստացվող),
- 3-րդ մակարդակ՝ իրական արժեքները ստացվում են գնահատման հնարքների միջոցով, որոնք ներառում են ակտիվի կամ պարտավորության գծով ելակետային տվյալներ, որոնք հիմնված չեն դիտարկվող շուկայական տվյալների վրա (ոչ դիտարկելի ելակետային տվյալներ):

21.1 Ֆինանսական գործիքների իրական արժեքի չափում

Ամորտիզացված արժեքով չափվող ֆինանսական գործիքներ, որոնց համար իրական արժեքը բացահայտված է

Ընկերության ֆինանսական գործիքների հաշվեկշռային արժեքները համարվում են իրական արժեքի խելամիտ գնահատում:

Առևտրային դեբիտորական և կրեդիտորական պարտքերը, դրամական միջոցները և դրանց համարժեքները իրացվելի են կամ կարճաժամկետ են, ուստի ենթադրվում է, որ հաշվեկշռային արժեքը մոտ է դրանց իրական արժեքին:

Փոխառությունների իրական արժեքները որոշվում են զեղչված դրամական հոսքերի մեթոդի կիրառմամբ՝ օգտագործելով զեղչման տոկոսադրույքը, որն արտացոլում է թողարկողի փոխառության տոկոսադրույքը հաշվետու ժամանակաշրջանի վերջի դրությամբ:

Կապակցված կողմերին շուկայականից ցածր տոկոսադրույքով տրամադրված և կապակցված կողմերից շուկայականից ցածր տոկոսադրույքով ստացված փոխառությունների իրական արժեքը գնահատվում է զեղչված դրամական հոսքերի մեթոդով՝ կիրառելով այն շուկայական տոկոսադրույքները, որոնք Ընկերությունը հաշվետու ամսաթվի դրությամբ պետք է վճարեր համանման ժամկետում և ապահովվածությամբ փոխառություն ստանալու համար: Ամենազգալի փոփոխականը զեղչման տոկոսադրույքն է:

Իրական արժեքի գնահատումը որոշվում է՝ օգտագործելով ներկա արժեքի հաշվարկման մոտեցումը: Իրական արժեքը գնահատվել է՝ զեղչելով պայմանագրով նախատեսված դրամական հոսքերը 10%-ով: Ամենազգալի փոփոխականը զեղչման տոկոսադրույքն է՝ 10%: Ընկերության այլ ֆինանսական գործիքները դասակարգվում են իրական արժեքի հիերարխիայի 2 մակարդակում: